

Kanetetab ge ne bo Bukuit ne Tillil eng'

JOHANA



Kolenji Jesu, A ng'eetyet, ak sobondo:
inendet ne iyana, agot ngo me, ko ta kosobei:

—JOHANA 11:25

KIT NE KITOKYINGEI SIRETAB BUKITAB JOHANA

Kiyai Jesu kaborunoik alak che chang' eng' taitab alamalyet che ma sirotin eng' bukuini: ago kigisir chu, si kobiit oyan ole Jesu ko Kristo, Weritab Jehovah; ak si kobiit ye oyani onyoru sobondo eng' kainennyi. —Johana 20:30, 31

Kiguuregei Johana “noto bo alamalyet ne kichamei Jesu.” Ma kibwati kele kichamei Jesu Johana kosiir alamalyet alak, ago abere *kigasei* mising' Johana eng' muguleldanyi agobo chamnyetab Jesu agobo ichek. Kiingen Johana chamnyetab Jesu inne ak kiiguitos agobo boisetab Kristo ak kit ne kinyonei koyaei eng' ng'onyuni.

Kingo kagobata kenysisiek che chang' koboch ngab kesir Bukuisiekab Matayo, Mariko ak Luka, ko kigimwaitaat konetisiosiek che bo lembech kele Jesu ko ki chito kityo ko u bik tugul. Kisir anyun Johana Bukuini si kobor kole, Jesu ko Jehovah ne kiilaach borto. Eng' kwong'utik che chang' che kiyai Kiptaiyat Jesu, ko kilewen Johana komie alak che kiiboru kole, Jesu ko INENDET iman ne noto kimwaitaagei. Kiguure kwong'utichuto “kaborunoik.”

Kiibor kora Johana kit ne kiwekyi Jesu kandoikab Yahudik che bo betusiechoto kot kogoito Inendet kigartat. Noto ko amu kimwaei Kiptaiyat Jesu kole kergei Inendet ak Jehovah! Iboru Johana ole *kigichopto* Jesu si koek “Aruet ne bo Jehovah” ne ibei tengekwojikab ng'ony. Kiigoitogei Jesu koek tiseiywot ne igesunotgei ne yamat eng' Jehovah si koek kagaigaet agobo tengekwojikab ng'ony.

Kisir Johana Bukuini si kobiit koyan Jesu ak kotaach sobondab koigeny, age tugul ne somani.

Saennyu anyun ni, ale, kondoun *inye* konetisioni ne bunu Logoiywek che Miach che kisir Johana, iyan Jesu ak itaach Inendet konyo sobondang'ung' si koek Yetindeng'ung' ak ko Kiptaiyat. Jesu ko Sobondo ak chamei kogonin sobonitonyi koigeny. Tos ma nyolu imwachi Inendet rani ile ibagaktoi sobet ne bo keny ak itaach Inendet? Iwekyi Inendet kongoi amu sobondo ne leel ne konin Inendet. Ibaibaege yamdaet koboto Inendet betut age tugul. Tebi eng' atebet ne iboiboi Inendet betut age tugul. Ak imwachi bik alak agobo Jesu ne kwong'utiet. Chamei Inendet bichoto agichek.

—V.R. Benson

OLE KINETITOGEI NG'OLYOTAB JEHOVAH

1. Sa kotoretin Jehovah. *Imakynige* toretetab Jehovah si kobiit iguiye kit ne inetige eng' Bukuit ne Tilil. Boisie Tiendab Kalosunet 119:18 koek saeng'ung': "Yat konyekyuk, si kobiit ageer tuguk che kikwong'e eng' ng'atu-tieng'ung'."

2. Soman kebeberwekab Sirutik che Tililen komie eng' ole mami bolatet. Bir mistarit kapkelieng'utab ng'alek che katoor muguleldang'ung'. Ibwat ile ng'atalun Jehovah eng' Ng'olyondennyi.

3. Wolu teebutik kobun kebebertab Bukuit ne Tilil ne kaisoman. Keer wolunaik che kaisir ngot ko kergei ak che mi bukuini pechit ne bo let.

4. Inetge ng'alekab metit. Soman ak imwa konyil che chang' ng'alekab metit ak koitet, agoi imuch imwa amegeere. Mie isirji cardit ng'alechato bo metit ak koitosiek si imuch iibote. Mwa ng'alechuto kotugul konyil che chang' si imuch ibwat eng' nyamnyumindo. Mwa kogasei chorueng'ung' si komwaun ole mi lelutik. Anan isir koitonoto ak igeerjine ak ne kigibir eng' bukuini ngot ko kesir ng'olyot age tugul eng' iman. Nyolu igetyige koitonoto konyil agenge eng' wigit kosakta wigisiek 7, ye ibata iyai konyil agenge eng' arawet, agot nda kiinai koitonoto komie. Kiwalei ng'ala-leng'ung' ak boisioniguk ye igonore muguleldang'ung' "konoruani mie." Lewen koitosiek alak kora si inetge eng' metit.



5. Ibwat agobo Ng'olyotab Jehovah ne kaisoman, ne kaine-tge, ak ne kainetge eng' metit. Kigoarorji Jehovah kayomisutik che bo kamanut ichek che ibwatoti Ng'olyondennyi bet ak kemoi:

Amat komanda bukuini bo Ng'atutik eng' kuting'ung', ago ibwati bet ak kemoi, si irib iyai ko u tugul che kigisi-rji: si iyai oreng'ung' kotunen, ak kiberurin mising'.

—Josua 1:8


Ago baibaitune ng'atutietab Jehovah; Ak kobwatoti ng'atutiennyi bet ak kemoi. Ak kogergeit ak ketit ne kigiminji ole negite ainosiek, Ne yiei logoekyik eng' betusiekyik, Ama restos sogekyik; ak koberurok kiy age tugul ne yaei.

—Tienwogikab Kalosunet 1:2, 3

6. Tiem yai tuguk che mwaei Jehovah. Mwawech Jakobo 1:22 kole, "Ago oegu che yaei ng'olyot, amat oegu che kasei kityo, ogenege okwege." Kiiyanie Jesu chito ne kasei ng'alekyik ama yaei, chito ne berber ne kiteech gonnyi ng'aniek barak. Kilul goyoto kiga kiteech ng'aniek barak, ye kingorobon ak kobwa mogochek ak usonaik. Ago muren, anan ko kobogorio, werit anan ko chepto, ne kasei ng'alekab Jesu ak *kogas it* ichek, ko kergei ak chito ne ng'om, ne kiteech gonnyi ruandet barak. Kingorobon ak kobwa mogochek ak usonaik, kotonon goyoto amu kigiteech ruandet barak. Kinertosi ak kegimegitu eng' sobonwekyok ak kenae Jehovah kosiir, ye *kiyae* tuguk che mwaei lnendet. Nai kit ne nyolu iyai, ak isub noto. Mi Jehovah koboten, ak kotoretin lnendet.

7. Yamde Ng'olyotab Jehovah koboto chito age. Sait age imache iyamde tuguk che inetige koboto bikab gong'ung'. Mwaei Ne Kibwate Ng'atutik 6:7 kole, "Ak inet lagoguk eng' kagiiletab ge, ak ing'alale ye itebye eng' gong'ung', ak ye iwendoti eng' oret, ak ye irue, ak ye ing'eete."

ATINDIOT 1. KABORUNET NE BO KAMANUT AGOBO JESU KRISTO



Johana 1:1-18

¹Eng' taunet ko kimi Ng'olyondet, ak kimi Ng'olyondet ak Jehovah, ak ki Jehovah Ng'olyondet. ²Kimi inendet ak Jehovah eng' taunet. ³Kigiyai tuguk tugul eng' inendet; ak kima kiyai kiy age tugul ne kiga keyai ne kima yai inendet. ⁴Kimi sobondo eng' inendet; ak ki lapkeiyetab bik sobonato. ⁵Ak iluu lapkeiyet eng' mesundeito; ak kima iterter mesundeito lapkeiyonoto. ⁶Kinyo chi, ne kiiyok Jehovah, ne kiguure Johana. ⁷Kinyo chichoto koek baoriat, si kobaorianji lapkeiyet, si kobiit koyan bik tugul amu inendet. ⁸Kima ko lapkeiyonoto inendet, ago kinyo si kobaorianji lapkeiyono-

to. ⁹Kimi lapkeiyet ne bo iman, ne nyonei ng'ony, ne iluuchin chi tugul. ¹⁰Kimi ng'ony inendet, ak kigiyai ng'ony eng' inendet, ak kima nai ng'ony inendet. ¹¹Kinyonji chechik, ak kima taach inendet bikiyik. ¹²Ago tugul che kitaach inendet, ko kiigochi kamuget koek lagokab Jehovah, ichek che iyani kainennyi: ¹³che kigisich, ama eng' korotik, anan eng' magetab borto, anan eng' magetab chi, ago eng' Jehovah. ¹⁴Ak kiek Ng'olyot borto, ak komeny kwenunnyo (ak kigigeer torornatennyi, torornatet ne u ne bo ne kigii inegei kobunu Kwanda), ko nyiitat mieindo ak imanit. ¹⁵Kibaorianji inendet Johana, koititen kole, Inendet ni ne kiamwaitoi ale, Inendet ne isubwa koegu ne bo tai eng' ane, amu ki bo tai inendet eng' ane. ¹⁶Amu kigitaach achek tugul che bo nyiiennyi, ak mieindo eng' mieindo. ¹⁷Amu kigigon Ng'atutiet eng' Musa; kibwa mieindo ak imanit eng' Jesu Kristo. ¹⁸Mami chi ne kigeer Jehovah ole kigoi; kigong'ang'wech inendet Werit ne kigii inegei, ne mi tegetab Kwanda.

Kit ne Kiyaei

A. Sir woluneng'ung' agobo teebutiet age tugul. Soman kogeny atindiot ne bunu Bukuit ne Tilil, ngot ko maimuch iwolu teebutiet.

1. Ki ng'o "Ng'olyondet"? _____ (koitet 1)

2. Kimi ano "Ng'olyondet"? _____ (1)

3. Kimi nee eng' "Ng'olyondet"? _____ (4)

4. Iluu lapkeiyet eng' ano? eng' _____ (5)

5. Ng'o ne kiiyok Jehovah si kobaorianji lapkeiyet? Chi ne kigiguure _____ (6)

[Nito ko ki Johana Kabatisanindet, ma Johana sirindetab Bukuini bo Logoiywek che Miach.]

6. Ng'o che kima taach Jesu? _____ (11)

[Kima taach Kristo Israel bororiet ak ko bik che kigalewenjigei Jehovah.]

7. Nee kamugo ne kigochin ichek che taachei Jesu? Kigochin kamuget koek _____ (12)

8. Ichek che kigesich eng' Jehovah ko kigisich, "ama eng' _____, anan eng' magetab _____, anan eng' magetab _____, ago eng' _____." (13)

[Ye egu chito weritab Jehovah, ko Jehovah lnendet inegei ne yaei kwong'utionito. Mayaaksei nito ye sich chi sigik che Kristianik; mayaa-ksei amu magun chito age kesichin kogeny. Siget ne leel ko boisetab Jehovah.]

9. Kiek nee "Ng'olyondet"? _____ (14)

10. Kimeny ano "Ng'olyondet"? _____ (14)

11. Nee tuguk aeng' che ketaache ye kitinye Kristo? "Kigitaach achek tugul che bo _____, ak _____ eng' _____" [isubu kaberuret kaberuret age]. (16)

12. Ng'o ne ki kanyolji konyo si kong'ang'wech agobo Jehovah, amu mami chi ne kigeer lnendet ole kigo? _____ ne kigii inegei. (18)

[Jesu ko Jehovah ak kimi ak Jehovah Kwanda koigeny ak kinyo ng'onnyuni konam bortab chi. (Keerjine koitet 18 ak koitet 1.)]

B. Sir koitoni ak inetge eng' metit: **Johana 1:12.**

Jesu Ko Jehovah—Kinyo Inendet Eng' Itondab Chi

Ma kimuchi ketaach Jesu ak kiyan kainennyi, ye tomo kenai kele ng'o Inendet. Mwaei koitet 18 kole kinyo Jesu si kong'ang'wech Jehovah, amu mami chi ne kigomuch koriky Jehovah ole kigoi ak kogeer Inendet kimni. O lilindo ne bo torornatetab Jehovah kosiir. Tilil inne Inendet kosiir.

Tebyei chito eng' mesundeito amu kiptengekyo inendet. Mesundeito ko ng'onyuni ne tiemei koesio Jehovah. Ago kigeere anyun eng' koitet 5 kele maimuch mesundeito koterter lapkeiyet.

Mwaei Bukuit ne Tilil, kole, **“Lapkeiyet Jehovah, ama mi mesundeito eng' inendet agot kitigin”** (1 Johana 1:5). Kigiguure Jesu **“Lapkeiyet ne bo Iman”** (koitet 9). Keeregei anyun chito eng' **Lapkeiyonoto bo Iman** kole kiptengekyo eng' iman. Keerei kora chito ole u Jehovah iman eng' **Lapkeiyonoto bo Iman**. Imuchi kora konai ole kanyol kotepto chi eng' iman.

Kit ne bo kwong'et ne tia anyun ye iluuchin Lapkeiyet ne bo Iman (Jesu) ng'onyuninyonet imen si kong'ang'wech Jehovah! Kimwa chepto age ne ming'in kole, **“Jesu ko pichait ne karan kosiir ne kigobir Jehovah!”** Jesu ko itondab Jehovah—Inendet ne imuchi bik kogeer ak kogas ak konam.

Kimeny Jesu kwenutab bik. Ng'olyondoni mwaei kole **“kimeny”** eng' koitet 14 ko ye kiweech kolen **“kitebi.”** Kitebi Jesu eng' kwenunnyo. Kichopchi Jehovah bikab Israel Gonny ne ki Emaid kityo, eng' Arorutiet ne bo Keny, amu kiuoti eng' betusiechoto. Kitebe Jehovah kwenutab bikyik che lewenotin eng' Emaid ak eng' let ko hekalut ne kimi Jerusalem. Ye kingo bata kenysiek alage kobagakta torornatetab Jehovah hekalunato, amu tengektab Israel. Ago nguno anyun, ko kiga koweek Jehovah **“kotebe”** kwenutab bikyik eng' Jesu ye kiek chito! Tos ma kit ne bo arogenet ne o anyun amu manai che chang' Inendet? Ago tugul che kiiyan kole kibunu Jesu Jehovah iman, ko kigeer torornatetab Jehovah eng' Inendet ye kingonyo (koitet 14).

Jesu ko Ng'olyondet Ne Jehovah

Mwaei Bukuit ne Tilil, kole, **“Taitab kelyekyuk ng'olyonde-ng'ung', ak lapkeiyetab orennyu”** (Tienwogikab Kalosunet 119:105). Kiguure kora Jesu **“Ng'olyot.”** (Keerjine koitet 1 ak koitet 14.) Bukuit ne Tilil ko Ng'olyotab Jehovah ne kigisir, ak Jesu ko Ng'olyotab Jehovah ne Sobei, amu ng'ang'weigei Jehovah eng' Jesu.

“Jehovah, ne king'alalji kwanisiekyok keny eng' maotik, eng' keheberwek che chang' ak eng' ortinwek che chang', ko ne kagong'alalwech eng' betusiechu bo let, eng' Werit” (Hebranik 1:1, 2a).

Jesu ko Sobondo Ne Jehovah

Tos kiiteebege betut age ile amu nee si keegu lagokab Jehovah ye kitaach Jesu konyo mugulelwekyok? Noto ko amu **“Kimi sobondo eng' inendet”** (koitet 4).

Ne bo tai kegeere kele kiyaei Jesu tuguk tugul che soptos (koitet 3 ak 10). **“Kigitoi keyai tuguk tugul eng' inendet ak ko bo inendet; ak bo tai inendet eng' tuguk tugul, ak namegei tuguk tugul eng' inendet”** (Kolosaik 1:16b, 17). Bunu Jesu sobondo tugul amu Inendet ko Jehovah. Tiiei kora Inendet sobonato tugul. **“Inendet ne igochin tugul sobondo, ak kabuset... amu kisoptosi eng' inendet, ak kebendoti, ak kemi”** (Boisionik 17:25b, 28a).

Ko u ye kiek chito ne sobei ye kingo busyi Jehovah kabuse-tab sobondo ye kinge yaei, ko u noto agine kigigochi Kiptaiyat Jesu kimnatet kogochi sobondab koigeny (ne bo tamirmiriet) tugul che bwanjin Inendet (Johana 17:2). **“Inendet ne tinyei Werit kotinyei sobondo: inendet ne matinyei Weritab Jehovah ko matinyei sobondo”** (1 Johana 5:12).

Tos kiitaach sobondo ne leel—ne bo tamirmiriet—amu kii-taach Kiptaiyat Jesu ak iyan iman kainennyi? I lakwetab Jehovah anyun, ne kigesich eng' Inendet, ak itinye sobondab koigeny ne bunu Inendet, ngot ko kiiyai ko u noto. Ye iwendote lapkeiyennyi, inae mising' agobo sobondo ne miten ne bunu Inendet, ak inyoru anyun kaberoik che tesoksei (koitet 16). Ngot

ko tomo itaach Inendet, ko tos ma mie isom Inendet nguno konyo muguleldang'ung' si kogonin sobondo ne leel—noto sobondo nenyinet ne bo koigeny?

Abere kiigas betut age ye kiigongony chi kurgetab gong'ung' ak kiiyati konyo go, tos u noto? Tononi nguno Kiptaiyat Jesu eng' komostang'ung' ak kogongonyi Inendet kurgetab muguleldang'ung'. Kigoaror Inendet kole, "**Ngokas chi kutinnyu ak koyat kurget, awendi ole mi inendet**" (Ng'ang'utiet 3:20).

ATINDIOT 2. KOCHOPCHIN JOHANA KABATISANINDET ORET JESU




Johana 1:19-34

¹⁹Ak ni ko baornatetab Johana, ye kingoyok Yahudik tisiik ak Lawik eng' Jerusalem koba koteebe kole, I ng'o inye? ²⁰Ak king'any inendet, ama tiiyo; king'any kole, Ma a Kristo ane. ²¹Ak kiteebe inendet kole, Nee anyun? I Elija? Ak kile,

Ma a inendet. I maotiondonoto? Ak kiwol kole, Achicha. ²²Kilenji anyun inendet, I ng'o inye? si kobiit kewolji che koyokwech. Imwae nee agobo inyege? ²³Kile, A kutitab chi ne ititeni eng' surkwen, Olitit oretab Kiptaiyat, ko u ye ki-mwa maotiot Isaia. ²⁴Ak icheget che kigiyok ko ki bo Parisaik. ²⁵Ak kiteebe inendet, kolenji, Kalya anyun si ibatisanisiei, ngo ma i Kristo, anan Elija, anan maotiondonoto? ²⁶Kowolji Johana bichoto kolenji, Abatisanisie beek: ago tononi eng' kwenung'wong' age ne mongen, ²⁷inendet ne isubwa, ne manyoljina atiach anokab kweonikyik. ²⁸Kiyaogis tuguchuto eng' Betania Jordan komosin, ole kiibatisanisie Johana. ²⁹Eng' betut ne bo aeng' kogeer Johana Jesu konyonjin,

ak kole, Ogeero, Aruet ne bo Jehovah, ne ibei tengektab ng'ony! ³⁰Inendet ni ne kiamwa ale, Isubwa chito ne egu ne tai eng' ane: amu ki bo tai eng' ane. ³¹Ak kima angen ane inendet; ago si kobiit kibarta inendet eng' Israel, kianyony anyun amu noto abatisane beek. ³²Ak kibaorian Johana, kole, Kiageer Tamirmiriet kochorugei eng' kipsengwet ko u cheptuget; ak kotebe inendet. ³³Ak kima angen inendet: ago inendet ne kiiyokwa abatisane beek, ko inendet ne kimwawa kolenja, Chichoto igeere ko-



chorjingei Tamirmiriet, ak kotebe inendet, ko noto ne ibatisane Tamirmiriet ne Tilil. ³⁴Ak kiageer, ak kiabaorian ale nito ko Weritab Jehovah.

Kit ne Kiyaei

Sir ng'olyot ne bo iman ole ma sirotin ng'alek.

1. Kimwa Johana Kabatisanindet kole inendet ko _____ chi ne ititeni eng' _____ (23).

2. Kimwa Johana Kabatisanindet ng'alekab maotiot Isaia kole, " _____ Kiptaiyat" (23).

3. Kimwa Johana kole, nga _____ Kiptaiyat Jesu, ko kigiiti koek _____ (ko. 27, 30).

[Iboru nito kole, O Jesu kosiir, agot nga kisib konyo Johana Kabatisanindet kochob oret agobo Jesu. Kimwa agot agine Johana kole kima konyoljin koyai boisietab otwogindet, noto kotiach anak che bo kweonikab Jesu. Kiingen Johana agobo etunatatetab Jesu.]

4. Kiguure Johana Jesu _____ ne bo _____ ye kingo borjin Inendet bik, amu Jesu ne ibei _____ (29).

5. Kinai Johana Jesu kole Inendet ko Weritab Jehovah (ak ko Jehovah ne kigisich ko u chi) amu kichorgei Tamirmirietab Jehovah eng' kipsengwet ko u _____ ak kotebe Inendet (32). Ki kaborunet nito kora kole, kinyonei Jesu si kobatisane _____ (33).

Kechobei Oret agobo Kiptaiyat Jesu

Kitebi bororietab Israel ne kilewen Jehovah, kenysisiek bogol ang'wan ko matinyei maotio ne ipchin ng'olyo ne bunu Jehovah. Kitinyei ichek Arorutiet ne bo Keny ne kimwachin magutik ak kayomisutikab Jehovah. Kiingen ichek kole itei betut age ye nyonei Mesia, ne Inendet ko Katiagindet ne kigoil Jehovah, nyo kobou Israel. Kimwa Isaia kole tun sichei Inendet bergeiyat ak koguure kainennyi "Immanuel" ye kiweech ko "Mi Jehovah kobotech" (Isaia 7:14). Kimwa agine Mika kole tun kisikyin Betlehem ak koek bounindet eng' Israel (Mika 5:2).

Tos ibwati anyun ile kikwong'dos ak kogasegei ne tia bik ye kigasei koamdoi Johana Kabatisanindet ak komwachin ichek kochopgei agobo nyonunetab Kiptaiyat? Kinyolu kochoptogei ano anyun bichoto? Kisomani eng' Matayo kele, kiamda Johana kole, "**Osigu; amu kagorik bounatetab kipsengwet**" (Matayo 3:2). Kiibatisan anyun Johana bik che chang' eng' ainetab Jordan, "kong'anyei tengekwogikwak." Nai ile, ye tomo kochobogis mugulelwek kotaach Jesu, konyolu matiny koistoegei tengekwogikwak (kosik). Ngot kiyani keistoege tengekwogikyok, choto tuguk che kitoorjinige che ma bo iman, kabwatutik che ma bo iman, ak boisionikyok che ma nyolu eng' taitab Jehovah ak eng' taitab bik, ko ki chobotin anyun kenai kele Jesu ko "Oret" ne iiteech gab Jehovah, ak ketaach Inendet koek Yetindet ne Laitoriat ak ko Kiptaiyat. Kiiboru kabatisanetab Johana ne ki bo beek agobo kaundoetab chalwogik. Kinyonei Jesu si kobatisanis eng' Tamirmiriet ne Tilil kotililisie mat (Matayo 3:11, 12) ak kogonech sobondo ne leel ne bo imanda (sobondo ne bo Kristo ne menyei eng' achek).

Tos kiing'ang'ji Jehovah chalwogikuk?

Jesu, Aruet ne bo Jehovah

Kiingen komie bikab Israel ole te kamanutietab aruet eng' taitab Jehovah agobo boisiennyi eng' sobonwekwak. Kiyai Jehovah boisiet eng' muguleldab Parao si kotiach bikab Jehovah choto Israelik, ye ki otwogik ichek keny eng' Misri. Ki-boisie Jehovah korotwek taman kobire Parao si kochamji bichu toogunotin koba, che abere kiitei koitenywa olobo millionisiek aeng'. Koroito ne bo let ak ko ne king'wanit mising', ko ye kimong'ji Jehovah emetab Misri ak kobek taiywek tugul eng' kemout agenge.

Ago kimi oret ne kimuchi kechilile. Gab chi age tugul ne kigas it ng'atutietab Jehovah ko kisob. King'at Jehovah keeny aruetab kechir ne libwob. Kinyolu keise korotikab aruanato tugatugik tuwai eng' kurgat ak rateiywotab tugatuk eng' got age tugul. Kiegu korotichoto kaborunet eng' kurgotikwak, si ye kingo-geer Jehovah korotichoto "kosiirtoe" si mabar ichek ko-roato ng'emisie. Bo kwong'et ne tia chobet ne u nito! Kiek anyun ng'atutiet korib lagokab Israel igortab Paska kenyit age tugul, kong'eete betunoto si koek kabwatet agobo betut ye "kisiirtoe" ichek kiruogetab Jehovah amu kigeiile korotikab aruet kurgotikwak. (Kinyorjin atindiondonito Komong'u 12:1-42.)



Mie ne tia ye kingo borjingei Kiptaiyat Jesu bik, kotook eng' betut ne bo tai ko "Aruet ne bo Jehovah"! Kinyo si kobiit koek aruet ne kitisisie, ne tilil ak ko matinyei muruonindo anan ko tengek, si ye kiile kurgotikab mugulelwekyok korotikyik che kitumdagei "kosiirtoenech" kiruogetab Jehovah agobo tengek-wogikyok! Mwawech Hebranik 9:22 kole, "**Ngo mami tumdaetab korotik ko mami nyoetab kaat.**" Mwaei Atebetab Lawik 17:11 kole, "**... korotik che yaei kagaigaet agobo sobondo.**"

Arekab kechir tugul che kigiény eng' kenyisiek tugul agoi koit Kristo, ko kiiboru agobo Jesu, Inendet ne kinyo ko "Aruet ne bo Jehovah" kotumda korotikyik, si eng' tugul che iyani Inendet koek Yetindet keise korotikyik kurgotikab mugulelwekwak. Kimwa Jesu kole, "**Amwawok, iman, iman, ale, Inendet ne kasei ng'olyondennyu, ak koyani inendet ne kiiyokwa, kotinyei sobondab koigény, ama wendi ole mi kiruoget, ago kagomong' eng' meet komong'ji sobondo**" (Johana 5:24).

Kimwa Isaia 53:7 kole, "**Kiigei inendet aruetab kechir ne kiwieri kwo ole kieng'e.**" Kinyo Kiptaiyat Jesu si kome agobo tengekwogikab ng'ony. Tos ma mie iweeki kongoi Inendet eng' kutit ne kasaksei nguno amu kiek Aruet ne bo Jehovah, ne kitumdagei korotikyik agobo inye si koib tengekwogiguk? Mageerei Jehovah tengekwogiguk ye keer Inendet korotikab Werinnyi eng' muguleldang'ung'; keerei Kristo Inegei tiseiywot ne igesunotgei ne kiib tengekwogikyok kogesen eng' bortanyi ak kiruokyi agobo achek. Ilosunot Jehovah!

Imache kitiachin eng' chalgwogiguk?
Mitei kimnatet eng' korotik.
Imache iterter yomsosiek tugul?
Kimen korotikab Jesu.



ATINDIOT 3. KENAEI JESU



Johana 1:35-49

³⁵Kogeny eng' betut ne kiisubu betunoto, ko kitononi Johana, ak aeng' che bo alama-lyennyi; ³⁶ak kigeerot inendet Jesu kowendoti, ak kole, Ogeero, Aruet ne bo Jehovah! ³⁷Ak kigas choto aeng' che bo alama-lyennyi kong'alali inendet, ak kosub Jesu. ³⁸Ak kiwewelgei Jesu, ak kogeer ichek kosubu,

ak kolenji, Ocheng'e nee? Ak kilenji inendet, Rabbi (ye kiweech kele, Konetindet), ime nye ano? ³⁹Kolenji ichek, Obwa si ogeer. Kibwa anyun kogeer ole menyei, ak kitebi koboto inendet betunoto; ki olo bo sait taman. ⁴⁰Ki Andrea, ne tupcho ak Simon Petero, age eng' choto aeng' che kigasei kong'alali Johana, ak kiisub inendet. ⁴¹Kisib konyor Simon ne tupcho, ak kolenji, Kagenyuru Mesia (ye kiweech, ko Kristo). ⁴²Kiimutyi inendet Jesu. Kigeer Jesu inendet, ak kole, I Simon weritab Johana: ta keguurenen Kepa (ye kiweech, ko Petero). ⁴³Kimach anyun kwo Galili eng' betut ne kiisubi betunoto, ak kinyor Pilipu: ak kilenji Jesu inendet, Isubwa. ⁴⁴Ak ki bo Pilipu Betsaida, nganaset ne bo Andrea ak Petero. ⁴⁵Kinyor Pilipu Natanael, ak kolenji, Kagenyuru inendet, ne kisir Musa eng'

Ng'atutiet, ak maotik, Jesu ne bo Nasaret, weritab Josep. ⁴⁶Ak kilenji Natanael, Tos imuchi kobun Nasaret kiy age tugul ne mie? Kolenji Pilipu inendet, Nyo si igeer. ⁴⁷Kigeer Jesu Natanael konyonei ole mi inendet, ak kole agobo inendet, Ogeero, Israelindet iman, ne matinyei ng'alset! ⁴⁸Kolenji Natanael inendet, Kenaena nee? Kowolji Jesu kolenji, Kageerin, ye kemi mogoiywet kel, kotom koguurin Pilipu. ⁴⁹Kowolji Natanael kole, Rabbi, i Weritab Jehovah; i Laitoriatab Israel.



Obwa si Ogeer

Kimach kotes konai agobo Jesu aeng' che ki bo alamalyetab Johana Kabatisanindet ye kingogas komwaei Johana kole, "Ogeero, Aruet ne bo Jehovah!" Kiiawat kole mie konai ole kimenyei Jesu. Kimwachi Jesu ichek kolenji, "Obwa si ogeer." Tos ibwati ile ki mie ne tia ng'alalet ne kitinyei ichek koboto Jesu! Toogu kele kiinetgei ichek tuguk che chang' ago-

bo Jesu, amu kiwo ngunoto Andrea komwachi Petero, ng'etab kamennyi, kolenji, Kagonyor ichek Mesia!

Mesia ye kiweech ko "Ne iilat" (Kristo)—inendet ne iyogu Jehovah konyo ko maotiot, tisiindet ak ko laitoriat ne nyo kobou Israel. Kimwa maotik che chang' eng' Arorutiet ne bo Keny agobo chichito o kinyonei. Kisir agine Musa agobo Inendet. Kimwachi Jehovah Musa kolenji, "**Ang'eetyini maotiot eng' tupchosiekwak, ne u inye; ak ande ng'alekyuk kutinnyi, ak komwachi ichek tugul che ang'ate inendet**" (Ne Kibwate Ng'atutik 18:18). Kimwa agine Kiptaiyat Jesu kole, "**Amwae tuguchu ko u ye kiineta Kwanda**" (Johana 8:28b). Kieet ne tia anyun boiboiyetab bichuto!

Tos imache inai agobo Jesu kot? Tos imache ites inetge agobo Inendet? Tos iteebege ilen Jesu ko ng'o? Mwaun anyun rani Jesu kolenjinin, "Nyo si igeer." Kinyoru tuguk amu kasiaget. Kimwa Kiptaiyat Jesu kole, "**Ocheng', si onyuru**" (Matayo 7:7b). Igeere Jesu iman ngot inyonji Inendet! Ye iteb koboto Inendet ak igochi boroindo kong'alalun eng' Ng'olyo-ndennyi, koborungei. Imuchi inyendet, aginye, inai Jesu. "**Ak agochi ichek muguleldo ne naena, kole, a Jehovah: ak koek bi-kyuk, ak aegu Kamuktaindenywa: amu weekyinagei eng' mugulelwekwak tugul**" (Jeremia 24:7).

Baornatosiek Agobo Jesu

Ye nyonji chi Kiptaiyat Jesu ak konai Inendet iman, kosich maget komwachi bik alak agobo Inendet! Machei komwachi bik alak kit ne ingen agobo Jesu, si kobiit kobwa choronokyik "nyo kogeer" agichek. Ngot ingen Kiptaiyat Jesu ak inetige eng' Inendet, ko tos mamie imwachi chito age logoiywechu miach?

Sirji yu bore ile, Jesu ko ng'o eng' inye:

Som Jehovah kogonin boroindo rani si imwachi chito age baornateng'ung', si komuch chichoto agine "konyo si kogeer."

ATINDIOT 4. KOIPCHIN BOIBOIYET JESU IGORTAB KATUNISIET



Johana 2:1-11

¹Ak kimi katunisiet eng' betut ne bo somok eng' Kana ne bo Galili; ak kimi oloto kame-tab Jesu: ²ak kiga kiguurji katunisiet Jesu agine, koboto alamalyennyi. ³Ak ye kingorar divaik, kolenji kametab Jesu inendet, Ma kotinyei divaik. ⁴Ak kilenji Jesu inendet, Chebiosoni, kiting'ege nee ak inye? tom koit sainnyu. ⁵Kolenji kamet otwogik, Kiy age tugul ne kamwawok, oyai. ⁶Ak kimi

oloto terenik lo che eechen che bo beek, che bo koik, ko u biteetab katililetab Yahudik; kiyamei age tugul debeisiek mut anan ko lo. ⁷Kolenji Jesu ichek, Onyiit beek terenichoto. Kiinyiit anyun mising'. ⁸Ak kilenji, Osiilu nguno, ak oipchi bounindetab igorta. Ak kiipchi anyun. ⁹Ak ye kingochamjam bounindetab igorta beek che kagoek divaik, ama nai ole kabunu (ago kiingen otwogik che kasiilei beek), koguur bounindonoto sandet, ¹⁰ak kolenji, Igoitoyi chi tugul divaik che miach korok; ak ye kagoee bik mising', kogon che ma miach: kaigonor divaik che miach agoi nguno. ¹¹Taunet nito ne bo kaborunoikyik ne kiyai Jesu eng' Kana ne bo Galili, ak kiibortoyi torornatennyi; ak kiivan inendet alamalyennyi.

Kit ne Kiyaei

Boisie ng'alek che bunu atindiot si inyiit kebeberwek che ma sirotin ng'alek.

1. Kimwachi kametab Jesu otwogik kolenji, “_____” (koitet 5).

2. Ye kingo mwachi Jesu otwogik konyiit terenikab beek, ko “_____” (7).

Kasetab it ko Yateiywotab Boiboiyet

Abere kitomo kogeerei kametab Jesu koyaei kwong'utiet. Nga u noto ko kiingen kole imuchi koyai Inendet kiy ne toretisiei. Kingen komie kele divaik che kigiboisie eng' igorita bo katunisiet, ko ma divaik che yaei bik kobogityo. Kima ko divaik che kergeri ak che chobei bik betusiechu. Kibunu divaichuto beekab logoekab sabibuk che anyiny kot. Tia anyun kaiimutiet ne kimi kabwatutikab bichoto ye kingemwa kele kagorar divaichoto!

Abere i Kristianindet. Tos mi kiy ne "kigoraran"? Tos ngab korartaenen muitaet ne bo betut komugul? Tos tebyei buch nguno muguleldang'ung' ama mi boiboiyet anan ko chamnyet? Ingen Jesu kit ne



imakyinige. Machei Inendet koberure sobondang'ung' kit ne bo kwong'et! Machamei Inendet iimge eng' sobetab Kristoinateng'ung' amu mami boiboiyet ak kalyet ak chamnyet betut komugul. Kigoyomis Inendet kole, **"ak ne iyani inendet ko magigochin kolilan"** (Romanik 9:33b). Ago mi anyun ung'otiet ne nyolu inai! Kasetab it ko yateiywotab kaberuret. **"Kiy age tugul ne kamwawok, oyai."** Yaei Jesu kit ne bo kwong'et eng' achek, ye kigas it Inendet. Iboru kasetab it kole kimang'u Inendet eng' iman.

Ngot ko mi chi ne kogolelun, ko tos koinyochi kaat chichoto (Matayo 6:14, 15)? Tos igonore konorueng'ung' kipsengwet (Matayo 6:20)? Abere ibwati ile memuchi igochi tuguguk boisietab Jehovah. Agot nga u noto, kongen Jesu tuguk che imakyinige. Imang'u Inendet eng' kasetab it.

Mwaei Jehovah rani kole, **"Ingonyiak Tamirmiriet"** (Epesoek 5:18). Mami Kristianindet ne imang'u konyor boiboiyet eng' sobennyi, ngot ko maigochi Jehovah boroindo konyiit inendet Tamirmiriennyi betut age tugul.

Abere ma i chi ne bo Kristo. Sait age ibwati ile kaiimet buch soboni. Imuchi anyun aginye, igas it ng'atutiet ne bo Kiptaiyat Jesu. Nyonji Inendet si itaach sobondanyi—konyiin inne. Ki-

mwa Inendet kole, “Kianyoy si kobiit konyor sobondo, ak kotepto sobonato inne” (Johana 10:10b).

Kigas it inne otwogichoto. Kima rong’ji beek koit kwenut anan korik kutuswekab terenik. Kiinyiit “mising.” Ibu boiboiyet ak kaberuret kasetab it ne kegase it Jehovah eng’ muguleldo komugul. “Kit age tugul ne oyae, oyai kobunu muguleldo, ko u eng’ Kiptaiyat, ama ko u eng’ bik; ongen ole otaache eng’ Kiptaiyat melekto ne bo borotet . . .” (Kolosaik 3:23, 24).

Tos mitei kiy ne kigomwaun Kiptaiyat Jesu iyai igase it Inendet? Tos manyolu iyai kioto rani?

Kitesak kayanetab che bo alamalyet ye kingogeer kwong’utionoto kiyai Jesu—“kiiyan Inendet.” Nerei agine kayaneng’ung’ ye igas it Ng’olyotab Jehovah ak igeer koboisiei Inendet. Kergei kayanennyoy ak simoloik che mitei borwekyok. Nyoru kagimitet ye kiboisiei. Ongelewen kebendate kayanet betut age tugul. “Sobei ne bo imanda eng’ kayanet” (Romanik 1:17).

KAYANET = Kaalewen Abagakta Yaitwogik
Amang’un Nguno Eng’ Tugul

ATINDIOT 5. KOTILILI JESU HEKALUT



Johana 2:13-22

¹³Ak . . . kitogosta Jesu Jerusalem. ¹⁴Ak kinyor kotebyei eng’ hekalut che kialdoi eik ak

kechirek ak cheptugenik, ak walikab siling’isiek: ¹⁵ak kiyai kipcharitit ne bo rogoonik che kisach, ak koon tugul komanda eng’ hekalut, koboto kechirek ak eik; ak koranda siling’isiek che bo walik, ak kogabui mesosiekwak; ¹⁶ak kilenji icheget che kialdoi cheptugenik, Oib tuguchu koba eng’ oli; amoyai gotab Baba koek ole kiyae mung’aret. . . . ¹⁸Kiwolji anyun Yahudik kolenji, Iboruech kaborunet ngoro, amu iyae tuguchu? ¹⁹Kowolji Jesu

kolenji, Ong'em hekaluni, si ang'eet kogeny eng' betusiek somok. ²⁰Kile anyun Yahudik, Kigiteech hekaluni eng' kenyisiek artam ak lo, ak ing'eeti inye eng' betusiek somok? ²¹Ago king'alali inendet agobo

hekalut ne noto ko bortanyi. ²²Ye kinging'eet anyun inendet komong' eng' che kibek, kobwat alamalyennyi kole kiga komwa ng'olyondonito; ak kiïyan sirutiet, ak ng'olyot ne kiga mwa Jesu.

Kit ne Kiingen Jesu

Tos ibwati kit ne kiiboru "paska"? Kiging'alale agobo nito eng' pechit 10. Kiwo Jesu Jerusalem amu ki betusiekab paska. Kwong'utiet ne tia anyun tuguk che kigeer eng' hekalut! Kima kotoogu kele ki ole kilosune Jehovah anan ko ole kilititegei eng' taitab Jehovah. Kigergei ak oldab aldaisiet. Kima komi Jehovah kwenunywa. Kinerech mising' Kiptaiyat Jesu.

Kimachei iman bik koal tuga ak nego koboto taritik si koek kagochinoik che kieng'jin Jehovah. Ago kiiberberi bichoto chemung'arainik eng' alyet. Kogeny ko kialdoi tuguchoto soptos eng' hekalut orit! Ma kwong'et ye kion Jesu ichek tugul komanda eng' hekalut! Kimwa Jesu eng' Mariko 11:17 kole, "**Tos ma sirat kele, Kiguure gonnyu gotab saet ne bo bororiosiek tugul? ago kaoyai okwek koek kebenetab rebik.**"

Kimwachi Kiptaiyat Jesu kandoik che bo Yahudik kole, tun naei kole tinyei kimnatet iman kotilil hekalut eng' betut ne ng'emei ichek hekalunnyi. Kiing'eeti Inendet Kiptaiyat Jesu hekalunato eng' betusiek somok! Kikwong'io amu kimanai kole king'alali Jesu agobo bortanyi. Kiingen Jesu kole tun igartoti Inendet kandoichuto bo Yahudik. Kiingen kora kole, tun king'eeti Inendet eng' betutab somok komong' eng' che kibek, ye kagogartat bichoto Inendet.

Ng'alale Jesu Hekalut ne Bortanyi


"Kinyi torornatetab JEHOVAH" keny hekalut ne kararan ne kiteechei Solomon. Kimanda torornatonato bo Jehovah eng' hekalunato ak kiging'em amu kiot bororietab Israel cheptalelisiek che bo lembech. Let koteech kogeny hekalunato ichek

che kimachei koweekyigei Jehovah. Kimwa Jehovah eng' betusiechoto kole, "... ak kobwa tuguk che chamei bororiosiek tugul [Mesia], ak anyiit goi torornatet, mwaei Jehovah ne bo lugosiek" (Hagai 2:7). Kigeere anyun nguno Jesu konyonei si kobiit kotilil hekalut! Kimwa eng' yuto kole, bortanyi ko hekalut ne bo Jehovah!

"Amu menyei eng' inendet eng' borto nyiit tugul ne bo Jehovah" (Kolosaik 2:9). "... Inendet ne king'ang'ak eng' borto ..." (1 Timoteo 3:16). **"Ogeero, manachi bergeiyat, ak kosich werit, ak keguure kainennyi Imanuel; ye kiweech ko ni, Mi Jehovah kobotech"** (Matayo 1:23).

"Ne manaei agot agenge eng' bounik che bo betusiechu: amu nda kiga nai, ta kima kogartati Kiptaiyat tab torornatet" (1 Korintoek 2:8). Tos ibwati ole kiiborundo Kiptaiyat Jesu toronatenyi eng' Atindiot ne bo 4 (Johana 2:11)? Kimanai kandoichoto bo Yahudik kole kimi kwenunywa Kiptaiyat ne bo torornatet, komenyei bortab Jesu, ak kotinyei kamuget kotilil hekalunnyi!

Mitei ano Hekalutab Jehovah Betusiechu?



"Mongen okwek ole o hekalut ne bo Jehovah, ak menyok Tamirmirietab Jehovah?" (1 Korintoek 3:16).

Menyei Jesu eng' Tamirmiriet ne Tilil, chi age tugul ne kigo-taach Inendet eng' iman konyo muguleldanyi! Borwekyok ko hekalunnyi! Bo kwong'et ne tia ng'olyondoni! **"Tos mongen ole borwekwok ko hekalut ne bo Tamirmiriet ne Tilil ne mitei eng' okwek, ne otinye eng' Jehovah? ama o bo ge okwege; amu**

kigialenak kamanutiet: otoror Jehovah anyun eng' borwekwok" (1 Korintoek 6:19, 20).

Bo kamanut ne tia anyun eng' achek kesopche eng' sobonwek che tililen! Manyolu keyai tengek eng' borwekyok, amu ngo kigetaach Kristo konyo sobonwekyok, ko kigituiyenech Inendet ak nyolu keegu che iyanotin eng' Inendet. Tinyei Jehovah kimnatet kotilil hekalunnyi. Tinyei Inendet kimnatet kotilil kebeberwek che bo sobonwekyok che maiboiboi Inendet. Ongigochige anyun kotugul katililennyi. Itililech Inendet eng' Ng'olyondennyi. **"Itilile nee mureno orennyi? Kogas it, ko u ng'olyondeng'ung' "** (Tienwogikab Kalosunet 119:9). **"Ngot ke ng'anye tengekwo gikyok, koyanat ak ko bo imanda konyoiywech kaat tengekwo gikyok, ak kotililech eng' kiy tugul ne ma bo imanda"** (1 Johana 1:9). **"Ago ngot kebendote lapkeiyet, ko u ye mi inendet eng' lapkeiyet, keting'ege yamdaet, ak kotililech korotikab Jesu Werinnyi eng' tengekwo gikyok tugul"** (1 Johana 1:7).

Ma kele yaei Jehovah Kristianindet agenge inegei koek hekalut, ago kiguure kora Kristianik tugul kibagenge **"bortab Kristo."** **"Eng' achek che ki chang', ki borto agenge eng' Kristo"** (Romanik 12:5a). **"Ak inendet metitab borto, noto kaniset"** (Kolosaik 1:18a).

"Kristo Jesu inendet ko koita ne o ne bo luita; ne kituiyechin teekset age tugul ne kiginamnyo koek agenge, koet koek hekalut ne tilil eng' Kiptaiyat; kigiteechak ak okwek oegu agenge eng' inendet, ole menyeyi Jehovah eng' Tamirmiriet" (Epesoek 2:20b-22). Chamat ne tia anyun chi age tugul ne menyeyi Jehovah! Nyolu anyun kiborji atebetab rirennet ak chamnyet ko u ye kiyachini ichek, keyachini Kristo ko u noto.

Ongemwa koboto Paulo kele, **"Ko u noto agine nguno kitorori Kristo eng' bortanyu, ngo eng' sobondo, anan eng' meet"** (Pilipik 1:20b).

Ongenai komie kele borwekyok che hekalusiek ko oldab saet, ole king'alale ak Jehovah betut age tugul ak ko ole kinae kele mi Inendet kobotech. Manyolu keyai koek **"kebenetab rebik"** ole tuhei torornatetab Jehovah magutik ak boiboiosiekab soboni.

ATINDIOT 6. KOMWACHIN JESU BOUNINDET OLE KISIKTOI CHI KOGENY



Johana 3:1-8, 14-21, 36

¹Kimi chi ne bo Parisaik, ne kigiguure Nikodemo, ki bounindet ne bo Yahudik: ²kinyo chichoto ole mi inendet kemoi, ak kolenji, Rabbi, kingen kele i konetindet ne bunu Jehovah: amu mami chi ne imuchi koyai kaborunoichu iyae inye, ngo mami Jehovah koboto inendet.

³Kowolji Jesu kolenji, Amwaun, iman, iman, ale, Ngot ko ma kisich chi eng' siget ne leel, ko magoi imuch kogeer bounatetab Jehovah. ⁴Kolenji Nikodemo inendet, Kisiktoi ano chi ye kagoosit? Imuchi kogetyigei moetab kamet kogeny, ak kesich? ⁵Kowolji Jesu kolenji, Amwaun, iman, iman,

ale, Ngot ko ma kisich chi eng' beek ak Tamirmiriet, ko magoi imuch komong'ji bounatetab Jehovah. ⁶Ne kigisich eng' borto ko borto; ak ne kigisich eng' Tamirmiriet ko tamirmiriet. ⁷Amekwong' amu kamwaun ale, Kanyol kesichok eng' siget ne leel. ⁸Uysin koristo ole machei, ak igase cheennyi, ago mengen ole bunu, anan ole wendi: ko u noto chi age tugul ne kagisich eng' Tamirmiriet. ¹⁴Ak ko u ye kiigartat Musa erenet eng' ong'atet, kigartoti ko u noto Weritab chi matiny: ¹⁵si konyor sobondab koigeny eng' inendet age tugul ne iyani. ¹⁶Amu kicham Jehovah ng'ony mising', kot kogoito Werinnyi ne kigii inegei, si malus age tugul ne iyani inendet, ago si konyor sobondab koigeny. ¹⁷Amu kima iyokyi Jehovah Werit ng'ony koruokyi ng'ony; ago si kesor ng'ony eng' inendet. ¹⁸Magiruokyin chi ne iyani inendet: ago inendet ne maiyani, ko kagiruokyi, amu ma iyan eng' kainetab Weritab Jehovah ne kigii inegei. ¹⁹Ak ni kiruoget, amu kinyonji ng'ony lapkeiyet, ak kicham bik mesundeito

kosiir lapkeiyet; amu ki yaach boisionikwak. ²⁰Amu wechei lapkeiyet chi tugul ne yaei yai-tio, ama nyonei inendet ole mi lapkeiyet, si mang'ang'ogis boisionikyik. ²¹Ago nyonei ole mi lapkeiyet inendet ne yaei

imanda, si kobiit kibarta boisionikyik, kele kigiyai eng' Jehovah. ³⁶Tinyei sobondab koi-geny ne iyani Werit; ama keerei sobondo ne magase it Werit, ago tebe neregekab Jehovah baragunnyi.

Kit ne Kiyaei

A. Sirji ng'alek che bo iman che mong'une atindiot ole masiro-tin ng'alek.

1. Ki _____ Nikodemo ne bo Yahudik (koitet 1). Kinyonji Jesu _____ (2).

[Chamei Jesu chi age tugul—ne banan anan ko ne magorio, ne somanat anan ko ne maingen kiy.]

2. Kiibwati Nikodemo kole Jesu ko ki _____ ne bunu Jehovah (2).

3. Kimwa Jesu kole kanyol k_____ chi eng' s_____ ne l_____ si komuch kogeer bounatetab Jehovah (3).

4. Magoi imuch chi komong'ji bounatetab Jehovah ngot ko ma kisich eng' b_____ ak T_____ (5).

[Kaguiyetab Nikodemo agobo beek, ko katililet. Eng' Atindiot ne bo 2 kobatisanisie beek Johana Kabatisanindet kong'anyei bik tengekwo-gikwak ak koistoegei tengekwo-gichoto (noto ko sigunet). Kinyo Jesu si kobatisanis eng' Tamirmiriet ne Tilil ak kogochi bik sobondo ne leel. Nyolu kiyan keistoege tengekwo-gikyok ak ketaach sobondo ne bo Tamirmirietab Jehovah konyo mugulelwekyok si kemong'ji Bounatetab Jehovah.]

5. Ne kigisich eng' borto ko _____ (6).
[Iboru "borto" agobo borwekyok ak magutikab chi kora (Romanik 8:8, 9).]

6. Ne kigisich eng' Tamirmiriet ko _____ (6).

[Kitinye borwek che bo ng'onyuni, amu kisichech sigik che tinyei borwek agichek che bo ng'onyuni. Kinyoru kora tamirmiriet ne sobei ak kogitos tugukab tamirmiriet che bo Jehovah, ye kisich tamirmirikyok eng' Jehovah (1 Korintoek 2:12, 14).]

7. Kinyolu kigartat Weritab chi (Jesu) matiny (Kigartat eng' kimurtoiyot) ko u ye kiigartat _____ eng' ong'atet (14).

8. Kinyo Jesu amu k_____ Jehovah ng'ony si m____ age tugul ne iyani Jesu, ago nyoru s____ koigeny (16).

9. Kima iyokyi Werit ng'ony k_____ ng'ony (agot nga itei betut age ne iruokyin ng'ony); ago kiiyok Werinnyi si k_____ ng'ony (17).

10. M_____ chi ne iyani Jesu. Kiruokyin kityo chi ye ma _____ Jesu (18).

11. Kinyonji ng'ony lapkeiyet, ak kicham bik _____ kosiir _____ amu ki _____ boisionikwak. Kiguure Jesu nito "k_____ " (19). [Nito ko kiruoget ne bo koigeny ak besiet eng' Jehovah.]

12. Nyonei ole mi lapkeiyet inendet ne yaei _____ (21).

[Ma chito ne yaei ne mie ne nyonei ole mi lapkeiyet. "Mami ne yaei ne mie, achicha, mami agot agenge" (Romanik 3:12). Chito ne yaei imanda ko inendet ne ng'anyei tengektanyi iman ak kotaach katililetab Jehovah. "Ngot keng'anye tengekwoigikyok, koyanat ak ko bo imanda konyoiywech kaat tengekwoigikyok, ak kotililech eng' kiy tugul ne ma bo imanda" (1 Johana 1:9).]

B. Bir mistarit kapkelieng'utab koitosiechek Bukuit ne Tillil eng' Atindiot ne bo 6 (anan isirji kadisiek che mengechen), ak inetge eng' metit: **Johana 3:16** ak **Johana 3:36**.

Ole Kisiktoi Chi Kogeny

Kesich chi kogeny ko kesich eng' "siget ne bunu barak" si kotoi chito sobet age, ak konyor taunet ne ter. Sigetab chi eng' borto koyaei chi koek agenge eng' bik che bo gab chi. Siget ne bo tamirmiriet koyaei chi koek agenge eng' bik che bo gotab Jehovah. Boisienech Tamirmiriet ak kowal atebennyo. Kaborunet ko ni, chito ne kigochorso ko ma kochorsei kogeny. Kergeri ak ye usei koristo. Ma kimuchi kegeer koristo, ago kimuchi kegeer tuguk che yaei. "Meat" eng' tamirmiriet sobondab chito ne tomo kesich eng' Jehovah (Epesoek 2:1, 5). Kitilili tengekwo-gikyok amu meetab Kristo ak kebar atebennyo ne bo keny. Yaech Tamirmiriet eng' sainato kesopche eng' sobondo ne leel—nito sobondab Kristo ne kiging'eet. Nyolu anyun chuto tuwai si komong'ji chi bounatetab Jehovah. Nyonei siget ne leel ye nyo iman Tamirmiriet ne Tilil (noto Tamirmirietab Jesu) komeny borwekyok. "**Ngo matinyei chi Tamirmirietab Kristo ko ma nenyi**" (Romanik 8:9b). Kigonech atebet ne bo Kristo (2 Petero 1:4): kabwatutik che leelach, kamuget ne leel ne bo magutikyok, ng'omnatet ne leel ne kiguiye Sirutik che Tililen.

Tos kergeri atebeng'ung' ak ne bo Nikodemo? Abere imwae buch ile i chitab kayanet anan igase it ng'atutik tugul. Abere agot i kandoindet. Ago anyun, tos kigesichin kogeny eng' siget ne bunu barak eng' Tamirmiriet ne Tilil ne bo Jehovah, si iegu chito ne leel? "**Noto anyun, ngo mi chi age tugul eng' Kristo, ko kigeyai inendet koek chito ne leel: kagosiirto tuguk che bo keny; ogeero, kagoek che leelach**" (2 Korintoek 5:17). Ngot kotomo "kesichin kogeny" ko tos ma mie inyonji Jesu nguno, ko u Nikodemo? Som Kiptaiyat Jesu konyo sobondang'ung' si inyuru sobondo ne leel ak iegu agenge eng' lagokab Jehovah. "**Inendet ne tinyei Werit kotinyei sobondo: inendet ne matinyei Weritab Jehovah ko matinyei sobondo**" (1 Johana 5:12).

Musa Eng' Ong'atet

Kingo mitei keny lagokab Israel ong'atet ye kiindochin kandoindenywa Musa, kong'unyng'ung'so ak komwaitae tuguk che yaach Kainetab Jehovah ak Musa. Kibolio agobo ole kibaitoi Jehovah ichek. Kiiyok anyun Jehovah erenok kobwa kwenu-



tab bik si kosus ichek. Kibek bik che chang'. King'any bik chalgogikwak eng' taitab Musa. Kisom anyun bik Musa kosa Jehovah koisto erenochato. Kiwol Jehovah saenywa ago eng' oret ne ter. Kimwachi Inendet Musa kotany erenet ne bo sugunwet ak konde ketit ne itononi. Kisobei age tugul ne kainyal erenanito bo sugunwet, agot inendet ne kagosus erenet ne ng'wan sennyi. (Kinyorjin atindiondonito Koitosiek 21:4-9.)

Kergei tengekto ak susetab erenet ne tinyei ng'wonet. Kibegu iman eng' tengekwogikyok, kobate kiyan kityo Kiptaiyat Jesu ne kiek tengek agobo achek (agot nga kimayai tengek Inendet iman). Kibek bik che chang' eng' ong'atet. Kisopcho ichegei che kigainyal erenetab sugunwet. Kiiteechi Jesu Nikodemu kolenji, lusei agine ngot ko ma inyal (ma iyan) Jesu si kotaach sobondo ne leel.

Ko u ye kiinyal anyun bik erenet ne "kimeat" ak kosopcho, konyolu anyun kosiir konyal Inendet ne kigigartat eng' kimurtoyot ne ibei tengektab ng'onny eng' bortanyi (Johana 12:32, 33). Inyal si isob! Kima kemage kiy koguiyo bichoto "ole" kisopto ko kainyal erenanoto bo sugunwet. Kinyoljin kityo kogas it eng' kayanet. Ak kisor kayanonato!

Konyonjin Chi Lapkeiyet

King'anyei tengektanyo ye kibwanji Kristo, amu Jesu ko lapkeiyet ne bo iman (Johana 1:9). Tuchi mesundeito imanda, ago iboru lapkeiyet ole u kiy tugul iman.

Inendet ne leweni koteb ama nyonji lapkeiyetab Jehovah, ko kagotil kotepto tengekwogikyik ama igochin Jehovah boroindo kowal inendet. Tokyingei chitab tengek gehena matiny. Makiyngei Kristo inendet si kochilil. Tugul che matinyei Jesu eng' so-

bonwekwak kotebe neregekab Jehovah baragunya nguno, ago inendet ne taachei Kristo konyoru sobondab koigeny ne bunu Jehovah—nito ko sobondo ne teptoi koigeny eng' kipsengwet. “Ak ni ng’olyot ne kigigas eng’ inendet, ak keamwok, kele lapkeiyet Jehovah, ama mi mesundeito eng’ inendet agot kitigin. Ngot kemwa kele kitinye yamdaet koboto inendet, ak kebendoti eng’ mesundeito, kegenu, ama kiyae imanit: ago ngot kebendote lapkeiyet, ko u ye mi inendet eng’ lapkeiyet, keting’ege yamdaet, ak kotililech korotikab Jesu Werinnyi eng’ tengekwoikyok tugul” (1 Johana 1:5-7).

Ye machei chi kotebe tililindo kochamei keng’any chalwogikyik ak kenyochi kaat. Ngebwanjin Kristo anyun ko sobondo ak ngeesio ko meet. Ole iwendi itebe koigeny, kotiegei kit ne itile agobo Kristo, kotiegei kit ne iyachini lapkeiyet. Tos inyonjini lapkeiyet? Anan iung’egei?



**Amache ataach sobondo
eng’ Jesu Kristo nguno!**

kainet

tarikit

**KAYANET + NG’OLYONDET NE JEHOVAH WERIT (JESU) =
SOBONDAB KOIGENY**

ATINDIOT 7. KONU JESU BEEK CHE SOPTOS



Johana 4:5-42

⁵Kiit anyun nganaset ne bo Samaria, ne kiguure Sukar, ne negite koret ne kiigochi Jakobo werinnyi Josep: ⁶ak kimi oloto keringetab beek ne bo Jakobo. Kitebyei anyun Jesu eng' ye negite keringetab beek, amu ng'etatetab bandanyni. Ki olo bo sait lo. ⁷Kinyo kobogoriot ne bo Samaria kosiil beek: kolenji Jesu, Inaga aee. ⁸Amu kigaba alamalyennyni nganaset koal amitwogik. ⁹Kilenji anyun kobogoriot ne bo Samaria, Katepto ano si isoma beek che iee, ak inye ko i Yahudiot, ak ane ko a kobogoriotab Samaria? (Amu manamegei Yahudik ak Samarik.) ¹⁰Kowolji Jesu kolenji, Nda kengen konunetab Jehovah, ak inendet ne kalenjin, Inaga beek aee; ta kaisom inendet, ak ta kagagonin beekab sobon.

¹¹Kolenji kobogoriot, Kiptaiyandani, metinye kit ne isiile, ak loo keringet: inyorjini ano anyun beechoto bo sobon? ¹²I o inye eng' kwandanyo Jakobo, ne kigonech keringoni, ne kiee inendet, ak werikyik, ak tukyik? ¹³Kowolji Jesu kolenji, Age tugul ne eei beechu ko ta koamei meel kogeny: ¹⁴ago age tugul ne eei beek che agochini ko ma koamei meel agoi; ago egu beek che agochini kondab beek eng' inendet, che kutu agoi sobondab koigeny. ¹⁵Kolenji kobogoriot, Kiptaiyandani, inaga beechoto, si ma koama meel, si ma anyone asiile beek eng' oli loo. ¹⁶Kolenji Jesu kobogoriondonoto, Ui, iguur manong'otiondeng'ung', ak obwa yuto. ¹⁷Kowolji kobogoriot kolenji, Matinye manong'otiot. Kolenji Jesu, Kaimwa komie ile, Matinye manong'otiot: ¹⁸amu kiotebi ak manong'otaik mut; ak inendet ne omi tuwai nguno ko ma manong'otiondeng'ung': kaimwa anyun iman nito. ¹⁹Kolenji kobogoriot, Kiptaiyandani, kaageer ale i maotio. ²⁰Kisaei kwanisiekyok eng' tulwoni; ak olen okwek, Jerusalem ole kanyol kosae bik. ²¹Kolenji Jesu,

Kobogoriondoni, iyana, nyonei sait, ye ma osae Kwanda eng' tulwoni, anan eng' Jerusalem.

²²Osaе ne mongen: kisae achek ne kingen: amu bunu yetunet Yahudik. ²³Ago nyonei sait, ak kagoit nguno, ye saei Kwanda saik che bo iman eng' tamirmiriet ak imanit: amu cheng'oti Kwanda che u choto koek che saei inendet. ²⁴Jehovah ko Tamirmiriet: ak kanyol kosa inendet eng' tamirmiriet ak iman che saei inendet. ²⁵Kolenji kobogoriot, Angen ale nyonei Mesia (ne keguure Kristo): ye nyo inendet, komwawech tuguk tugul. ²⁶Kolenji Jesu, A inendet ne ang'alalun. ²⁷Kibwa anyun alamalyennyi; ak kikkwong'io amu king'alali ak kobogoriot; ago ma mwachi chi kole, Icheng'e nee? anan, Kalya si ong'alal ak inendet? ²⁸Kibagakta anyun kobogoriot terennyi bo bei, ak kwo nganaset, ak komwachi bik kolenji, ²⁹Obwa ogeer chito ne kamwawa tuguk tugul che kiayai atkinye kora: tos Kristo nito? ³⁰Kimong' anyun eng' nganaset kobwa ole mi inendet. ³¹Kingota kobwanei, kosom alamalyennyi, kole, Rabbi, amisie. ³²Ago kilenji ichek, Atinye amitwogik che aame che mo-

ngen. ³³Kolenjigei anyun alamalyennyi, Tos kagoipchi chi kiy ne amei? ³⁴Kolenji Jesu, Amitwogikyuk ko ayai mage-tab inendet ne kiiyokwa, ak agesu boisiennyi. ³⁵Momwae okwek ole, Ta komi arawek ang'wanu, si koit kesisiet? ogeero, amwawok ale, Oyot met, ak ogeer mbarenik, ole kagoleelagitu, kagoyam keges. ³⁶Inendet ne kesei kotaa-chei melekto, ak koyumi logoek che bo sobondab koi-geny; si koboiboitu tuwai ne kolei ak ne kesei. ³⁷Amu bo iman mwaoni eng' ni, Kolei age, kogesei age. ³⁸Kiayoktok oges che kima onyalilji: kigonyalilji alage, ak kaonam okwek uin-dab boisiennywa. ³⁹Kiiyan anyun inendet Samarik che chang' che bo nganasanato amu ng'olyotab kobogoriot, ne kibaorian kole, Kamwawa tuguk tugul che kiayai atkinye kora. ⁴⁰Noto anyun, ye kingo-



bwanji inendet Samarik, kosom kole kotebi koboto ichek: ak kibeni oloto betusiek aeng'.
41Ak kiiyan alak che chang' amu ng'olyondennyi; 42ak ki-

lenji kobogoriot, Kiyani nguno, ma amu ng'alaleng'ung': amu kagegasyige; ak kingen iman kele nito ko Yetindetab ng'ony.

Kit ne Kiyaei

A. Wolu teebutik che mong'une atindiot.

1. Nee tuguk che kigasei Jesu eng' muguleldanyi ak bortanyi che kenae kele ki chito iman ne u achek? (koitet 6)

2. Kilenji nee Jesu kobogoriotab Samaria? (7)

3. Ki amu nee si kokwong' kobogoriondonoto ko kang'alalji Jesu inendet? (9) _____

[Samarik ko ki lagokab Yahudik ak bikab emotinwek alak che kigaitungei ak Yahudik. Kima kosaei Jehovah ne bo Israel Inegei ago kisaei cheptalelisiek alak kora. Kima chamji Israelik Samarik kotoret ichek ye kiteechei kogeny hekalut eng' Jerusalem. Ago ibwati Kiptaiyat Jesu chi age tugul; agot nga kima ko biiteetab muren ne bo Yahudik kong'alalji kobogorio eng' taitab bik ko king'alalji Jesu kobogoriondonato amu ribei chi age tugul.]

4. Nee ne kita igochin Jesu kobogoriondoni nda kigasom? (10) _____

5. Nee terjinet ne mi ngee beek che bo keringet ak ngee beek che konu Jesu? (13, 14) _____

6. Nee ne kiingen Jesu agobo kobogoriondoni? (18) _____

[Ingen Jesu tengekwogikab ung'ot che bo chi age tugul.]

7. Nee ng'olyot ne kitoi kong'alale kobogoriondonoto, ye kingoborji Jesu inendet tengektanyi? (20) King'alale agobo koret ne kinyolu _____ bik.

[Kisaei Samarik eng' hekalunywa ne kimi Tulwetab Gerisim. Kiiyani kityo ng'alek che sirotin eng' bukuisiek 5 che bo tai eng' Arorutiet ne bo Keny. Tos imache kityo ing'alale kayano-siek buch ne kata nyolu ilitit sobeng'ung' eng' taitab Jehovah?]

8. Saitoi ano Kwanda saik che bo iman? (23) _____

[Nyolu kesichech eng' Tamirmiriet, si kobiit kesa Jehovah eng' iman.]

9. Kiyai nee kobogoriondonoto ye kingonai Jesu iman? (28, 29) _____

10. Nee ne kiigochi Jesu kobiyo ko u amitwogik? (34) _____

11. Kiiyani Samarik kole Jesu ko ng'o? (42) _____

B. Inetge eng' metit koitoni: **Johana 4:24.**

Ole Nertoï Kayanet

Tos ma kit ne kikwong'e ye kigeere ole kitesta tai kobogoriotab Samaria konai ak koyan agobo Jesu kosiir, ye kingong'alaljin Jesu Inendet? **Keer koitet 9.** Ne tai ko kigeer Jesu ko Yahudiot ne king'alalji inendet eng' talasiet. **Keer koitet 11.** Kites anyun kobarta kondit, ak kiguure Inendet "Kiptaiyandani". **Keer koitet 19.** Kiingen Jesu mising' inne agobo inendet, amu noto kobwati nguno kole abere maotiot Inendet. **Keer koitet 29.** Iyani anyun nguno kole abere Jesu ko Kristo, noto Mesia ne nyonei ng'ony.

Nerei anyun agine kayanennyo eng' Inendet ye kites kigochi Jesu boroindo kong'alalwech eng' Bukuit ne Tilil! "**Nyonei**

anyun kayanet eng' kaset, . . . ak nyonei kaset eng' ng'olyotab Kristo" (Romanik 10:17).

Nee Beek Che Soptos?

Kiibwati kobogoriotab Samaria kole mieitu eng' inendet ye ma koiimegei kowendi kosiilei beek eng' keringetab Jakobo. Abere kimitei beek ole bo futisiek 90 eng' keringet. Ago anyun kima kong'alale Jesu beek chuto kiboisie kotugul. King'alale Jesu beekab sobon che tisei meledab boiboiosiekab tenge-
kto. Beechoto soptos che king'alale Inendet ko konunet ne bo sobondab koigeny—noto sobondanyi. Beechoto kutu ko boi-boiyet ak kalyet che kinyoru ye kinyiitech Tamirmiriennyi ne Tili!

Kimachei iman kobogoriot beekab sobon, ago kimachei Jesu koborji chalwogikyik korok. Kinyolu kong'any ak koistoegei tengektanyi kotom kotaach beek che soptos kobun Jesu.

Kit ne Inetech Atindiondoni Agobo Boisiet ne Kiboisiechin Jehovah

1. Kanyol kogas chi tugul logoiywek che miach ak koyan Kristo si konyor yetunet. Nyolu kenai kele tinyei chi age tugul boroindab yetunet, agot che kigorat chalwogik mising'. Kiyai Jesu ko u noto.

2. Chobotin nguno mbarenik agobo kesisiet choto ko sobonwekab bik. Nyolu keyot met ak kegeerate ole te bik che mi komoswekyok che amei rubet agobo imanda ak ko chobotin kotaach.

3. Imuchi kogol chito age (komwachin bik alak agobo Jesu, kogoitoi kartasisiek che ibei Ng'olyotab Jehovah, ak koneti Ng'olyotab Jehovah). Imuchi kogesis chito age (noto komutyi chito Jesu). Nyoru boiboiyet ichek tuwai ne kolei ak ne kesei.

4. Kinyoru yametak ge ne siirei agot ne bunu amitwogik, ye kiyai magetak Jehovah ak kigesu boisiennyi betut age tugul.

5. Bo kamanut iman kemwachi choronokyok agobo Jesu, ago ne siirei kinyolu kimutyi ichek Inendet si kotaach eng' sobonwekwak.

ATINDIOT 8. KOSOABI JESU WERITAB KIBOITIOTAB KAPLAITORIAT



Johana 4:46-53

⁴⁶Kinyo anyun inendet kogeny Kana ne bo Galili, ole kiyae beek koek divaik. Ak kimi kiboitiot age ne bo kaplaitoriat, ne kimiani werinnyi eng' Kapernaum. ⁴⁷Ye kingogas kole kagomong' Jesu eng' Judea konyo Galili, kwo ole mi inendet, ak kisom kochorgei, ko-

soob werinnyi; amu ki negit kome. ⁴⁸Kolenji anyun Jesu inendet, Ngot ko mogeer kaborunoik ak kwong'utik, ko magoi oyan matiny. ⁴⁹Kolenji kiboitindonoto, Kiptaiyandani, choruge kotom kome lakwenyu. ⁵⁰Kolenji Jesu inendet, Ui inye; sobei wering'ung'. Koyan anyun chichoto ng'olyot ne kamwachi Jesu, ak kwo. ⁵¹Ak ye kita kochortagei, kotuiyo ak otwogikyik, ak kolenji, Sobei wering'ung'. ⁵²Koteebe anyun kole kogaigaitu ko tia. Kolenji anyun bichoto inendet, Kobagakta eset inendet amut sait tisab. ⁵³Konai anyun kwanda kole ko sainato ne komwachin Jesu kolenjin, Sobei wering'ung': ak kiiyan inendet, ak gonny komugul.

Kimnatetab Ng'olyotab Jehovah

Kiy tugul ne mwaei Jehovah, koyaakse! Jehovah ne kiyai kipsengwetisiek ak ng'ony ak tuguk tugul che mitei oloto komwaei ng'olyot kityo, kong'alaljin nguno kiboitiotab kaplaitoriat kolenjin, "Ui inye; sobei wering'ung' ". Ak kisobei wero to iman.

Kimwa Jesu kole isuldoi iman tuguk tugul che kigimwa eng' Bukuit ne Tilil (Matayo 5:18). Tos iyani Ng'olyotab Jehovah? Tos iyae ko u ye iyani—ko u ye kiyai chito ne kagesoman eng' atindiondoni?

Imuchi konyor kimnatet agichek ng'alekyok, *ngot komenyei*

Kristo mugulelwekyok. Kimwachi Jesu alamalyennyi eng' Mariko 11:22, 23 kolenji, **"Kowolji Jesu kolenji, Oyan Jehovah. Amwawok iman ale, Chi age tugul ne lenjin tulwoni, Kitutin ak kewirjin araraita; ko mabistoe eng' muguleldanyi, ago koyan kole, isuldoi tuguk che kamwa; konyoru tuguchoto."** Ye mi kayanet eng' Jehovah iman, komuchi konyor kimnatet ng'alekyok che kemwae. U nee ng'alek che imwae? Tos imwae ng'alek che bo kagiilet, kagaigaet, kamang'unet, ak chamnyet?

Kit ne Inetech Atindiondoni Agobo Saet

Tos wolu Jesu somutikyok betusiechu? Mwawech Hebranik 13:8 kole, **"Kergei Jesu .Kristo eng' amut ak ra, ak agoi koigeny."** Kingen kele nyolu kebwa tainnyi keibu somutikyok. Mwaei Inendet kole **"inendet ne nyonjina ko maone matiny"** (Johana 6:37b). Mwawech Inendet kole **"Osom, si kegonok; ocheng', si onyuru; ogongony, si keyatwok"** (Matayo 7:7).


Ne rubei noto, konyolu kebwa tainnyi kiyani kele wolwech Inendet. **"Ngo mami kayanet ko ma imugakseki kibaibai inendet: amu inendet ne rikyin Jehovah konyoljin koyan kole mi inendet, ak kole igochin meleкто icheget che cheng'ei inendet"** (Hebranik 11:6).

Nyolu koyamech wolunet ne konech Jesu. Kisom Jesu kiboi-tiotab kaplaitoriat kwo gonnyi, ago kimaiyan Jesu koyai ko u noto. Ne kita noto, komwa Inendet kole, **"Ui inye; sobei weri-ng'ung' ."** Sait age ko mawolun Inendet ko u someng'ung', ago yaun Inendet kotugul ak koyaei kotugul ko u Ng'olyondennyi.

Ma soruech kotugul kayanet eng' tuguk che inyalili borto, ago ibwech kandoinatet ak kalyet kotugul. (Inetge Hebranik 11:35-39.) **"Amogereri met eng' kiy age tugul; ago eng' kiy age tugul ko eng' saet ak somet koboto kongoi, ingonaak somutikwok eng' Jehovah. Ak ribei kalyetab Jehovah, ne siirei kaguiyet tugul, mugulelwekwok ak kabwatutikwok eng' Kristo Jesu"** (Pilipik 4:6-7).

Kigimiti kayaneng'ung' ye iyani Jehovah ak koboisiei Jehovah eng' kimnatet. Kigimiti agine kayanet eng' gong'ung', ko u ye kiiyan Jehovah got komugul ne bo kiboi-tiotab kaplaitoriat.

ATINDIOT 9. KOSOObI JESU CHITO NE MIANI



Johana 5:1-9, 14-19

¹Kingobata tuguchu kobiit igorta ne bo Yahudik; ak koto-gosta Jesu Jerusalem. ²Ak mi-tei Jerusalem tamboiyot, ne kainennyi ko Betesda eng' kutitab Hebranik, ye negite o-rmarichetab kechirek; kitinyei keterusiek mut. ³Kiruitos eng' oloto bik che chang' che kimia-ndos, che koriotin, che ing'waldos, che meiyotin, (kogeni wasetab beek: ⁴amu kichorjingei malaikaiyat ne bo Kiptaiyat tamboiyot betusiek alak, kowendi kowasei beek: si kisoob chi age tugul ne sib kochutei ko kawasgei beek, eng' miando age tugul ne kitinyei.) ⁵Ak kimi yoto chito age, ne kiga komian kenysisiek sosom ak sisi-it. ⁶Ak ye kingogeer Jesu chichoto koruei, ak konai kole ki u noto eng' betusiek che

chang', kolenji, Imache kisoobin? ⁷Kowolji chito ne miani kolenji, Kiptaiyandani, matinye chi, ne indea tamboiyot, ko kawasgei beek: amu ye ta anyone, kosib kochortagei age. ⁸Kolenji Jesu anyun, Ng'eet, ib itogung'ung', ak iwe. ⁹Ak kisob chichoto ngunoto, ak koib itogunnyi ak kwo. Ak ki sabato betunoto.

¹⁴Kingobata noto konyorji Jesu inendet hekalut, ak kolenji, Keero, kagisoobin: amatata iyai tengek, si manyonjin kit age ne ya ne siirei ni. ¹⁵Ki-wa anyun chichoto, ak komwachi Yahudik kole Jesu ne kago-soob inendet. ¹⁶Kius anyun Yahudik Jesu amu ng'olyondonito, amu kiyai tuguchu eng' betutab sabato. ¹⁷Ak kiwolji Jesu kolenji, Boisiei Baba agoi kora, ak aboisiei agane. ¹⁸Kicheng' anyun Yahudik mising' kole kobar inendet amu nito, amu kima bistoe sabato kityo, ago mwaei kole Jehovah Kwandanyi, koyaegei kogergeit ak Jehovah. ¹⁹Kiwolji anyun Jesu ichek kolenji, Amwawok, iman, iman, ale, Mayaei kiy Werit inegei, ago ne keerei koyaei Kwanda . . .

Kit ne Kiyaei

Inyiit ng'alek ole ma sirotin.

1. Kimi chito age ne kitebe ye negite tamboiyotab Betesda. Kiga komian inendet kenysisiek _____ (koitet 5).

2. Kitebe Jesu inendet teebutiet ne bo kamanut: "Imache _____?" (6).

3. Kimwachi Jesu chichoto koyai kit ne maimugaksei amu ki ma komuchi kong'eet. Kile Inendet, "_____, ib itogung'ung' ak _____" (8).

4. Kingo nyor Jesu chichoto kogeny eng' hekalut, kolenji, "Keero, kagisoobin: _____, si manyonjin kit age ne ya ne siirei ni" (14).

5. Kicheng' Yahudik kobar Jesu agobo tuguk aeng': (a) amu _____ kityo (18) [ye kingosoob chito eng' betut ne kima konyolu koyai boisio Yahudik], (b) ago mwaei kole Jehovah Kwandanyi, koyaagei _____ (18).

Tos Imache Kisoobin?

Abere imache kisoobin ak kigimit bortang'ung', ng'omnatet anan ko kabwatutik. Abere itinye atebet ne ya ne kigonamin ne kirindoin meboisiechi Jehovah eng' oret ne nyolu. Abere amei muguleldang'ung' nyitatet ak ng'wanindo.

Keerei Jesu kaiimutieng'ung' ak mwaun Inendet kolenjinin, "Imache kisoobin?" Abere itinye lotanik che ietege eng' ka-soobet. Abere i Kristianin inyege eng' gong'wong' anan eng' skuling'wong'. Anan ibwat ile kaiimutik ak nyalilwogik tugul che mitei eng' soboni kobwanjinin inyege. Ago anyun ma uuii noto eng' Jesu. Imuchi kosoobin Inendet eng' yoto! Ago imuchi komwaun iyai kiy ne maimugaskei eng' chi, ko u ye kimwachi chichoto kima komuchi kowendot kong'eet ak kwo, agot koib itogunnyi! Ye itau igas it Ng'olyotab Jehovah, ko konin Jesu kimnatet ak kosoobin Inendet eng' kiy age tugul! Ak kondoun anyun Inendet eng' sobetab katerterisiet.

ATINDIOT 10. NG'EETYET NE KING'EETYIN SOBONDO ANAN KIRUOGET

Johana 5:24-29

²⁴Amwawok, iman, iman, ale, Inendet ne kasei ng'olyo-ndennyu, ak koyani inendet ne kiiyokwa, kotinyei sobondab koigeny, ama wendi ole mi kiruoget, ago kagomong' eng' meet komong'ji sobondo. ²⁵Amwawok, iman, iman, ale, Nyonei sait, ak kagoit, ye kas che kigobek kutitab Weritab Jehovah; ak soptos icheget

che kasei. ²⁶Amu ko u ye tinyei Kwanda sobondo inegei, u no-to kigogochi Werit kotepto sobondo: ²⁷ak kiigochi kimnatet koyai kiruoget, amu Weritab chi inendet. ²⁸Amokwong'e nito: amu nyonei sait, ne tun kasei kutinnyi tugul che mi kererisiek, ²⁹ak komong'; ng'eetyin sobondo che kiyaei ne mie; ak kong'eetyi kiruoget icheget che kiyaei ne ya.

Kit ne Kibwatoti

Tos ma kwong'et ye kingo kagegas kogongonyi Jesu kurg-tab mugulelwekyok, ak kiyani Inendet ye kiyatyi konyo sobonwekyok, *kenyuru nyiganatet kele kitinye sobondab koigeny!* Kingen anyun kele magiruokwech. Kingen kele kigemong'u eng meet kemong'ji sobondo. Tos iteebege ile egundoi ano nito? Yaaksei nito amu mi sobondo eng' Jesu (koitet 26). *Maimuchi kobaibai Jehovah icheget che matinyei Kristo* (Romanik 8:8, 9). Ye tun kaging'eet icheget che matinyei Kristo komong'une kererisiek, komong'jin kiruoget ak kobesio ak Jehovah koigeny.

Kit ne Kiyaei

Inetge eng' metit Johana 5:24 si kogonin kotugul inai iman agobo yetuneng'ung' ak inyuru nyiganatet agobo noto. Kotugul ye igase Ng'olyotab Jehovah ak imang'u Inendet (ye igase it Inendet koboru kole imang'u Inendet), ko megochi boroinde Setani konde saget kabwatutiguk. Machei Jehovah inai ile i nyeni. Ngobiit kiy eng' kwenung'ung' ak Jehovah, koborun Jehovah kotook komie si imuch ing'any ak ibagakte. *Isoobi* chi Jehovah; *itaamsei* Setani.

ATINDIOT 11. JESU KO MAKATIAT NE BO SOBON

Johana 6:5-14, 35, 47-51, 53-56, 63

⁵Kingoyot met anyun Jesu, kogeer tuiyet ne o konyonjin inendet, kolenji Pilipu, Kiale ano makatinik si koam bichu? ⁶Kimwaei ni kotieme inendet: amu kiingen inendet kit ne machei koyai. ⁷Kowolji Pilipu inendet kolenji, Mayamei ichek makatinik che bo denarisiek bogol aeng', si konyor age tugul kitigin. ⁸Kolenji inendet age ne bo alamalyennyi, Andrea, ng'etab kametab Simon Petero, ⁹Mi yu werit age, ne tynyei makatinik mut che bo sairi, ak njirenik aeng': ago yamei nee anyun chuto eng' bik che te chu? ¹⁰Kimwa Jesu kole, Ochob bik kobuur. Ak kimi suwek che chang' oloto. Kiibuur anyun bik; ki olo bo elfusiek mut murenjoto. ¹¹Kinam anyun Jesu makatinik; ak kingo kagogoito kongoi, koropchi icheget che kitebyei ng'onny; ak ko u noto agichek njirenik che te che machei. ¹²Ak ye kingobiyo-ng'so, kolenji alamalyennyi, Oyum katuganik che kang'et, si mabet kiy. ¹³Koyum anyun katuganichato, ak konyiit ke-rebonik taman ak aeng' katuganichato bo makatinik mut

che bo sairi, che kang'etune icheget che kaamisiei. ¹⁴Ye kingogeer anyun bichoto kaborunet ne kayai, kole, Ni maotiot iman ne nyonjin ng'onny.

³⁵Kolenji Jesu ichek, A makatiat no bo sobon: inendet ne nyonjina ko magasei rubet agoi, ak inendet ne iyana ko maamei melel agoi.

⁴⁷Amwawok, iman, iman, ale, Inendet ne iyani, kotinyei sobondab koigeny. ⁴⁸A makatiat ne bo sobon. ⁴⁹Kiam kwanisiekwok mana eng' ong'atet, ak kibek. ⁵⁰Ni makatiat ne chorangei eng' kipsengwet, ne ngo am chi, ko mameei. ⁵¹A makatiat ne sobei ne kichorgei eng' kipsengwet: ngo am chi age



tugul makatiandani, kosobei koigeny: ee, ak bortanyu makatiat ne agoitoi agobo sobondo ne bo ng'ony.

⁵³Kolenji Jesu anyun ichek, Amwawok, iman, iman, ale, Ngot ko moam bortab Weritab chi ak oee korotikyik, ko motinye sobondo eng' oring'wong'. ⁵⁴Inendet ne amei bortanyu ak koei korotikyuk

kotinyei sobondab koigeny; ak ang'eeti inendet eng' betutab let. ⁵⁵Amu amdit iman bortanyu, ak korotikyuk ko che kieei iman. ⁵⁶Inendet ne amei bortanyu ak koei korotikyuk komenya, ak amenye inendet.

⁶³Tamirmiriet ne igoitoi sobondo; matilei kiy borto: tamirmiriet ak sobondo ng'alek che kaamwawok.

Kit ne Kiyaei

Inetge eng' metit koitosiechu: **Johana 6:35** ak **Johana 6:63**.

Kit ne Inetech Atindiondoni

1. Ingen Jesu tuguk che kimakyinige. Chobot Inendet konyiitwech kit age tugul ne kibanoni, ago machei Inendet korok kotiem ole u kayanennyu eng' Inendet. Makwech Inendet kinyal ak ketiiege Inendet eng' kit age tugul ne kimakyinige.

2. Kiigoito Jesu agine kongoi eng' che ng'ering' che kitinyei Inendet. Mwawech Jehovah kole, **“Omwae kongoi eng' tuguk tugul: amu nito magetab Jehovah eng' Kristo Jesu eng' okwek”** (1 Tesalonikek 5:18).

3. Imuchi Jesu kotoretch eng' kaiimutiet age tugul ak konyiitwech kit age tugul ne kimakyinige eng' aiyebindo. **“Ingobunji anyun inendet ne imuchi koyai mising' inne kosiir tugul che kisome anan che kibwati ko u kamuktaet ne boisie eng' achek, torornatet . . .”** (Epesoek 3:20, 21a).

4. Machamei Jehovah tuguk che betos buch. Makwech Inendet keboisie tuguk tugul che konech, **“si mabet kiy.”**

Makwech Inendet keboisie saisiejyok komie: **“Oboisie saisiejyok komie, amu yaachen betusiek. Noto anyun amoberberitu, ago oguiye kit ne u magetab Kiptaiyat”** (Epesoek 5:16, 17).

Makwech Inendet keboisie ng'omnatosiek ak nautikyok ko-

mie koboto kononet age tugul. “Kilenji kiptaiyandennyi, Kiyai ne mie, otwogindoni mie ak ne kiyani: koiegu ne bo iman eng’ tuguk che ng’ering’, kandein ibou tuguk che chang’: mong’ji anyun boiboiyetab kiptaiyandeng’ung’ ” (Matayo 25:21).

5. Kitaach alamalyet amitwogik che kiigochin Jesu, ak kogochi bik che kiamei rubet. Ye kitaache amitwogikab tamirmiriet kobun Jesu betut age tugul, ketinye kotugul agachek kit ne kiyamdoi koboto ichek che mi kobotech che makyingei “makatiatab sobon.”

Makatiat Konyil Aeng’

Kiboiboitu anyun bichoto chang’ ye kingonyor amitwogik ye kigagoam rubet. Kimach ichek koek laitoriandenywa Jesu, si ma koimegei koboisiei agobo amitwogik! Ago kiibwatyi anyun Jesu kit ne kiiyaak eng’ kwansiekwak keny. Kimi lagokab Israel rutoito kobunu Misri kobendi emet ne kigaiarorji Jehovah ichek. Kiam anyun rubet bichuto eng’ ong’atet. “Kiigochi” anyun Jehovah makatinik kobun kipsengwet si koam ichek betut age tugul! Ki kwong’utiet ne tia anyun nito (Komong’u 16:4-35)! Kimanai bik kole ki nee amitwogichoto, kiguure anyun *mana*, ye kiweech ko, *Nee nito?*

Let konet Jehovah bichoto amu nee si koyai Inendet nito. Kimwachi Musa bik kolenji, “**Ak ibwat oret komugul ne kigomutunenen Jehovah Kamuktaiyandeng’ung’ eng’ kenyisiechu artam eng’ ong’atet, si koming’inin, kotiemini, konai kit ne mi muguleldang’ung’, ngichame irib ng’atutikyik, anan ngo mechame. Ak kiiming’inin, kigonin koamin rubet, ak kibaenen mana, che kima inai, agot kwansieguk; si kogonin inai ile masobei chi eng’ amditi kityo, ago sobei chi eng’ kiy age tugul ne mong’une kutitab Jehovah**” (Ne Kibwate Ng’atutik 8:2, 3).

Nga kiigochi anyun Jehovah bichoto mana kobun kipsengwet kenyisiek che chang’, ko ki amitwogik choto che bo borto kityo. Agot nga kiam amitwogichoto, ko kiosegitu ak kobek bichoto. U noto anyun agine, ye kingobai Jesu bichoto ki chang’ betunoto, ko ki bo borto kityo amitwogichoto. Agot nga kiamis kot kobiyong’so ko kiit kora koosegitu ak kobek.



Ago kitinyei Jesu anyun logoiywek che eechen! Konu Jesu “makatiat” age, ne ngoam bik, ko mageerei meet. Ee, begu iman borwekwak, ago mabegu sobonwekwak ak kong’eeiti Kristo ye nyo Inendet eng’ betutab let. Kimwachi Jesu bichoto kolenji, Inendet, ko makatiat ne ter ne nyolu keam! Ki makatiat ne sobei ne bo sobonwekwak! Kibun Inendet Kipsengwet ko u ye kibunu mana! Kinyo Inendet si kogoito sobondanyi agobo ng’onyuni. Age tugul ne “amei”—anan tugul che taachei eng’ sobonwekwak—sobondo ne bo Jesu ko mabegu.

“Kiamdoi” ano makatiandani bo Sobon, ne Jesu? “Kieeitoi” ano korotikyik? Kiyae nito ye kiyani kele kiigoito Kristo bortanyi eng’ kimurtoiyot agobo yetunennyo. Nyolu kiyan kele Jesu ko Aruet ne bo Jehovah ne iundo i korotikyik tengekwoikyok. Nyolu ketaach konyo mugulelwekyok Tamirmiriennyi ne igoi-toi sobondo. Nyolu kora ketaach ng’alekyik che konu sobondo ye kinetige ak kegase it. Nyolu konyiech sobonito kotugul, ko u ye kimache keam amitwogik kotugul si koteech borwekyok.

Eng’ kaguiyetab tamirmiriet “iame” bortab Jesu ak “iee” korotikyik betut age tugul:

1. Wendote lapkeiyet ne bo Ng’olyotab Jehovah betut age tugul. Ye iyai tengek, ing’ang’ji Jehovah tengektang’ung’, si kotililin korotikab Jesu si itebe kotugul yamdaet ne mie ak Inendet (1 Johana 1:7, 9).

2. Som Jesu konyiitin Tamirmiriet ne Tilil betut age tugul. Tliege kamugetab Tamirmiriennyi ne menyin, eng' kiy age tugul ne iyae. Taach konetisiosiek betut age tugul che bunu lnendet eng' Bukuit ne Tilil. Sobondo, Ng'olyotab Jehovah eng' achek. Cheng' boroindang'ung' ne imuchi ing'alaljine Jehovah inyege betut age tugul. Mie kora, ibwatate agobo lnendet betut komugul. Ng'alalji lnendet eng' sobondang'ung' agobo kiy age tugul. Itese iigeitu Jesu anyun kotugul.

Kigochobun Jehovah kayomiset ne bo kwong'et ngot iyai tuguchoto: **“King'alaljigei anyun che iywei Jehovah: ak kieb it Jehovah kogas ak kigisir eng' tainnyi bukuitab kabwatet agobo ichek che iywei Jehovah, ak kobwati kainennyi. Ak mwaei Jehovah ne bo lugosiek kole, Bunjina ichek, eng' betut ne ayae ichek koek kinnyu ne nenyu anege; ak arire ichek ko u ye rire chi werinnyi ne boisiechin”** (Malaki 3:16, 17).

Ng'olyotab Jehovah ko Amitwogikab Sobondang'ung'

Kimwa Job kenya kole, **“Ma aweege let amete ng'atutietab kutinnyi; Kaagonor ng'alek che bunu kutinnyi kosiir amitwogik che nyoljina”** (Job 23:12).


Kimwa Jeremia kole, **“Kibiit ng'aleguk, ak kiaam; ak kiek ng'aleguk eng' ane boiboiyet ak kagasetab ge ne bo muguleldanyu: amu kimwaitoena kaineng'ung', ee Jehovah Kamuktai-ndet ne bo lugosiek”** (Jeremia 15:16).

Kimwa tienindet kole, **“Anyinyen ne tia ng'aleguk ye achamjami! Ee, anyinyen kosiir kumiat eng' kutinnyu!”** (Tienwogikab Kalosunet 119:103).

Kiigiil Petero kole, **“Omach mising' chego che bo ng'omnatetab tamirmiriet, che matinyei ng'alset, ko u manyurunik, si kobiit onerie agoi yetunet; ngo kiochamjam ole Kiptaiyat ko bo mieindo”** (1 Petero 2:2, 3).

“Ongeam” Ng'olyotab Jehovah kotugul!

ATINDIOT 12. KOWENDOTE JESU BEEK BARAK



Johana 6:16-21

¹⁶Ak ye kingoek lagat, ko-
chortagei alamalyennyi koba
araraita; ¹⁷ak kilany moinge-

tab beek, kolandae araraita
koba Kapernaum. Ak kiga koi-
menit, ak kitom koit Jesu ole
mi ichek. ¹⁸Ak kiwasegei ara-
raita amu kiusei usonet ne o.
¹⁹Ye kingo kagoba anyun eng'
araraita olo bo maelisiek so-
mok anan ko somok ak kebe-
ber, kogeer Jesu kowendoti
eng' araraita barak, ak kori-
kyin moinget: ak kiiyweis.
²⁰Ago kilenji ichek, Ane; amo-
iywei. ²¹Kocham anyun kota-
ach inendet eng' moinget: ak
kiit moinget ngunoto emet ole
kibendi.

Kit ne Kibwatoti

Tos itebe ole usei usonet ne o? Tos igeere koimen
sobeng'ung' nguno? Tos ibwati ile loo Jesu eng' inye? Tos itie-
me koboto alak che omi tugul oterter usononato eng' nyalulna-
teng'wong'? Agot ngo u noto eng' sobondang'ung', inai anyun
ile ribin Jesu. Ingen ak kogeerei lnendet kaiimut age tugul. Mi
lnendet koboten eng' sait ne mi nyalilda. Ameiyweisie. Igochi
lnendet boroindo kotoretin. Ituuchi tuguk tugul tainnyi. Imu-
tyoni beek che wasegei, ak kondoun eng' banda ne tala agoi
bitet age. "Ee, agot ngabune atebwetab uruetab meet, Ko
maiwei yaitio; *amu imi kobota*" (Tiendab Kalosunet 23:4a).

ATINDIOT 13. KONG'ALALI JESU AGOBO KATIAKNATET

Johana 8:31-37, 42, 47

³¹Kilenji Jesu anyun Yahudi-
choto kiga koyan inendet,
Ngot otebye okwek eng' ng'o-
lyondennyu, ko o alamalye-

nnyu iman; ³²ak onai imanda,
ak kotiachak imanda. ³³Kowo-
lji ichek inendet kolenji, Ki ke-
swekab Abraham, ak tom kee-
gu otwogikab chi age tugul ole

kinye kora: imwaitoi ano anyun ile, Kitiachok? ³⁴Kowolji Jesu kolenji, Amwawok, iman, iman, ale, Age tugul ne yaei tengek ko otwogindetab tengek.

³⁵Ak matebyei otwogindet eng' got koigeny: tebyei werit koigeny. ³⁶Ngotiachak anyun Werit, ko otiagotin iman.

³⁷Angen ale o keswekab Abraham; ago ocheng'e obara, amu matinyei ng'olyondennyu ole tebe eng' okwek.

⁴²Komwachi Jesu ichek ko-

lenji, Nda ka Kwandang'wong' Jehovah, ta kaochama: amu kianyo abunu Jehovah; kima anyo anege, ago kiiyokwa inendet.

⁴⁷Inendet ne bo Jehovah kogasei ng'alekab Jehovah: noto anyun mogase okwek, amu mobo Jehovah.

Johana 7:17

¹⁷Ngo machei chi age tugul koyai magetab Jehovah, konai konetisioni, ngo bo Jehovah, anan ngamwae anege.



Kit ne Kiyaei

Inyiit ole ma sirotin ng'alek:

1. Kolenji Jesu, Ngot _____ okwek eng' ng'olyondennyu, ko o _____ iman (8:31).

2. Itiachok _____ (8:32).

3. Age tugul ne yaei tengek ko _____ tengek (8:34).

4. Ngotiachak anyun _____ (omong'une tengek), ko otiagotin iman (8:36).

5. Komwachi Jesu ichek kolenji, Nda ka Kwandang'wong' Jehovah, ta _____ (8:42).

6. Inendet ne bo _____ kogasei ng'alekab Jehovah (8:47).

7. Ngo machei chi age tugul koyai _____ Jehovah, _____ konetisietab Jesu ngo bo Jehovah anan ko ma bo (7:17).



Johana 8:12

¹²Kimwachi Jesu anyun ichek kogeny, kolenji, A lapkeiyet ne bo ng'ony: inendet ne isuba ko mawendoti eng' mesundeito, ago nyoru lapkeiyetab sobondo.

Johana 9:1-9, 13-25, 33-38

¹Ak ye kisiirtoi, kogeer chito ne ki korat koboch ko kagisich. ²Ak kiteebe inendet alamalyennyi, kolenji, Rabbi, ng'o ne kiyai tengekto, chichi anan sigikyik, si kesich ko korat? ³Kowol Jesu kole, Kima yai chichi tengekto, anan sigikyik; ago si kobiit kotook boisiosiekab Jehovah eng' inendet. ⁴Kanyol keyai boisiosiekab inendet ne kiiyokwa, ko ta ko bet: nyonei kemout, ye ma komuchi chi kobois. ⁵Ye ta ami ng'ony, ko a lapkeiyetab ng'o-

ny. ⁶Ye kingo kagomwa ko u noto, kong'utyi ng'ung'unyek, ak kotangwar, ak koille konyekyik ng'ung'unyechato, 'ak kolenji Ui iunde eng' tamboiyotab Siloam (ye kiweech kele, Kiyokto). Kiwa anyun, ak koun, ak konyo kogeertoi. ⁸Kimwa anyun bikab kokwet, ak che kiga kogeer inendet eng' tai kole somindet, kole, Tos ma inendet ni ne kicham kotebyei ak kosomsei? ⁹Kole alage, Inendet; kole alage, Achicha, ago kerge ak inendet. Kole chichoto, A inendet.

¹³Kiimut ichek chichoto ki korat eng' tai, kwo ole mi Parisaik. ¹⁴Ki sabato betunoto ye kitangwari Jesu ng'ung'unyek, si koyate konyekab chichoto. ¹⁵Koteebe anyun Parisaik kogeny inendet kole, Ka-tepto ano si igeerte? Ak kilenji, Kagoille konyekyuk ng'ung'unyek che katangwar, ak kaaun, ak kaageerte. ¹⁶Kole alak che bo Parisaik anyun, Mabunu Jehovah chichi, amumaribei sabato. Ago kile alage, Imuktoi ano chi ne kiptengekyo koyai kaborunoik che u chu? Ak kibiit toiyet eng' kwenunywa. ¹⁷Kilenji anyun kogeer chito ne korat, Imwae nee

agobo inendet, amu kayat konyeguk? Ak kile, Maotio. ¹⁸Ma iyan anyun Yahudik agobo inendet, kole, ko korat, ak, kagogeerto, agoi koguur sigikab chichoto kagogeerto, ¹⁹ak koteebe kolenji, Tos wering'wong' ni, ne omwae ole kigisich ko korat? katepto ano si kogeerto nguno? ²⁰Kowol sigikyik kole, Kingen kele werinnyo nito, ak kingen kele kigisich ko korat: ²¹ago magingen ole katepto si kogeerto nguno; ak magingen inendet ne kayatei konyekyik: oteebe inendet; kogoet; ingomwa inegei. ²²Kimwa ng'alechu sigikyik, amu kiiywei Yahudik: amu kiga sib kochamnyechi Yahudik, kole, ngo ng'any chi age tugul kole Kristo inendet, kibeeto eng' sunagogit. ²³Kimwa anyun sigikyik amu noto, kole, Oteebe, amu kogoet inendet. ²⁴Kiguur

anyun ne bo aeng' bichoto chichoto ki korat, ak kolenji, Igochi Jehovah kalosunet: kingen kele kiptengekyo chichi. ²⁵Kowol anyun inendet kole, Ngo kiptengekyo chichoto, ko mangingen: angen kit agenge, ale, koa korat, ago ageerto nguno. ... ³³Nda ma bunu Jehovah chichi ko magoi imuch koyai kiy. ³⁴Kowolji inendet kolenji, Kigisikten iman tengekwojik, ak inetech? Ak kitoorta inendet kwo sang'. ³⁵Kigas Jesu kole kagetoorta inendet kwo sang'; ak kingonyor inendet, kolenji, Tos iyani Weritab Jehovah? ³⁶Ak kiwol kole, Ng'oto noto, Kiptaiyandani, si kobiit ayan inendet? ³⁷Kolenji Jesu, Kaigeer inendet, ak ko inendet ni ng'alali koboten. ³⁸Ak kile, Kiptaiyandani, ayani. Ak kogutung'ji kolos inendet.

Ng'o ne Kimwaei Nito?

1. Ng'o ne kimwa kole, "Nyonei kemout, ye ma komuchi chi kobois"? _____ (koitet 4).
2. Ng'o che kimwa kole, "Tos ma inendet ni ne kicham kotebyei ak kosomsei?" _____ (8).
3. Ng'o che kimwa kole, "Mabunu Jehovah chichi"? _____ (16). [Parisaik ko ki bikab kayanetab Yahudik ne ki ma ko bo iman. Kiigimgimi mising' kogas it ng'atutikab Musa ak biteetab bik.]

4. Ng'ò che kimwa kole, "Oteebe inendet, amu kogoeet," amu kiiywei Yahudik? _____ (21-23).

[Ki kiy ne ya mising' kibeeto chi eng' sunagogit. Kigiyachin chi ne kagimanda ko u chi ne kanam mogondosik. Kima kechamjin chi koamis anan koyai yamdaet eng' boisio.]

5. Ng'ò ne kimwa kole, "Nda ma bunu Jehovah chichi ko magoi imuch koyai kiy"? _____ (33).

6. Ng'ò ne kiteeb kole, "Tos iyani Weritab Jehovah?" _____ (35).

7. Ng'ò ne kimwa kole, "Kiptaiyandani, ayani"? _____ (38).

Ibu Jesu Lapkeiyet

Kiipchi Jesu lapkeiyet sobetab chito ne kigorat ye kingoyat konyekyik. Ago kimachei Jesu kobor kole kinyo iman si koyat konyekab sobonwekab bik tugul che mi mesundeito.

Kiisib koaror Jehovah eng' maotikyik kole nyonei Inendet ne ibu lapkeiyet. Kimwa Jehovah agobo Jesu kole, "**Kiaguurin, ane Jehovah, eng' imanda, ak anam eung'ung', ak aribin, ak agonin iegu arorutietab bik, iegu lapkeiyetab Bororiosiek; iyat konyek che koriotin, imoong'u kimonjororinik eng' korgoret, ak imoong'u che tebe mesundeito komong'une got ne kigiratyi**" (Isaia 42:6, 7). Kigeer Isaia betutab Jesu: "**Kogogeer lapkeiyet ne o bik che kibendote mesundeito: kogoluuchi lapkeiyet ichek che kimenyei emetab uruetab meet**" (Isaia 9:2).

Kinai Yahudik kole yaegei Jesu kogergeit ak Jehovah, ye kingomwa kole, lapkeiyet Inendet, amu Jehovah ko lapkeiyet. Mwaei Tienwogikab Kalosunet 27:1 kole, "**Jehovah lapkeiyennyu ak yetunennyu.**" "**Ye atebe mesundeito, koegu Jehovah lapkeiyennyu**" (Mika 7:8b). Kimwa Daudi ye kiweekyin kongoi Jehovah kole, "**Amu i tainnyu Jehovah: Ak ikwenyi Jehovah mesundeitanyu**" (2 Samuel 22:29).

Ye kingen Jesu, kingen Jehovah. Kimwa Jesu kole, "**Nda kionaa, ta kionai Baba agine**" (Johana 14:7a). "**Amu Jehovah ne kimwa kole, Tun iluu lapkeiyet kobunu mesundeito, inendet**

ne kiiluuchi mugulelwekyok, si kogon lapkeiyet ne bo naetab torornatetab Jehovah eng' togetab Jesu Kristo" (2 Korintoek 4:6).
Tos kiitaach lapkeiyonito?

Kebendate Lapkeiyet

Ichek che isubi Jesu ko ma kobendote mesundeito, ago lapkeiyet. **"Amu kio mesundeito eng' betusiek alak, ago o lapkeiyet nguno eng' Kiptaiyat: obendate ko u lagokab lapkeiyet"** (Epesoek 5:8). **"Oretab kiptengeginik ko u mesundeito: Manaei kit ne riichei ichek"** (Kalewenaik 4:19). **"Ago oretab che bo iman ko u lapkeiyet ne iluu, Ne iluu ko tesoksei agoi betut ne igesunotgei"** (Kalewenaik 4:18).

Ng'olyotab Jehovah ko Lapkeiyet. **"Taitab kelyekyuk ng'olyondeng'ung', Ak lapkeiyetab orennyu"** (Tienwogikab Kalosunet 119:105). Betut age tugul ye kisomani Ng'olyotab Jehovah, ko nyolu kegas ak kegas it kit ne mwaei. Iboru nito anyun kole **"kibendote lapkeiyet."** Kebendate lapkeiyet ko keyai kit ne mwaei Jehovah. Tos ibwati ng'atutietab Jesu ne ki-mwa kole, **"Ochamnye"**? Amu noto komwaei Ng'olyotab Jehovah kole, **"Inendet ne wechei ne tupcho komi eng' mesundeito, ak kowendoti eng' mesundeito, ama naei ole wendi, amu kagotuch mesundeito konyekyk"** (1 Johana 2:11).

Eng' emotinwek alak keboisie nyumbusiek kelae nesek che kibalei eng' ng'ony orit mising'. Kanyol keget komong' agot konyil agenge eng' wigigit. Ngot ko mayai ko u noto, ago kotebe mesundeito eng' ng'ony orit kotugul, kogortos. U noto anyun eng' achek; nyolu kebendate lapkeiyet kotugul, si maiberber Setani konyekab mugulelwekyok, ak kogochi kogorio kabwatu-tik ak mugulelwekyok.

Ki Lapkeiyosiek che mi Ng'ony

"Si kobiit oegu che matinyei lelut ak ko libwoben, lagokab Jehovah che matinyei kunenden eng' kwenutab ibinda ne kunur ak ko mastaat, che oluu eng' kwenunywa ko u lapkeiyosiek eng' ng'ony" (Pilipik 2:15). Kigolewenech Jehovah si kibarte **"telunatosiek che bo inendet ne kiguurok omong'une mesu-**

ndeito omong’ji lapkeiyennyi ne kikwong’e” (1 Petero 2:9). Tos lapkeiyet sobeng’ung’ eng’ ichek che mi koboten? Ngot ko ma u noto kong’atech Paulo ne kiyoktoi kolen, **“Ongireegu boisionikab mesundeito, ak ongilaach karikab lapkeiyet”** (Romanik 13:12).

Nyolu kechoboge agobo nyonunetab Kiptaiyandennyo. Ngegasu ak kebendote Lapkeiyet, ko kichobotin. **“Okwek tugul ko o werikab lapkeiyet, ak werikab bet: ma ki bo kemoi, anan mesundeito; noto anyun among’ keruiye ko u bik alak, ago onge-ripse ak keegu che ribegei”** (1 Tesalonikek 5:5, 6).

Kebois ko ta ko Bet

Nyolu keboisie ye ta komi lapkeiyet eng’ ng’onyuni, agoi koweek Kiptaiyat Jesu. Itei betut ne siirtoi ng’onyuni (Matayo 5:18). Ichek che mabwanjin lapkeiyet komong’jin mesundeito ne bo koigeny (Matayo 22:13). Ongeboisie si kobiit keng’any konyekwak, **“ak koweek eng’ mesundeito kobwanji lapkeiyet, ak eng’ kimnatetab Setani kobwanji Jehovah, si konyor ichek nyoetab kaat ne bo tengekwojik . . .”** (Boisionik 26:18).

Kiteebe Yahudik Jesu betut age kolenji, **“Kiyai nee, si kobiit keyai boisionik che bo Jehovah?”** Kowolji Jesu kolenji, **“Ni boisietab Jehovah, ale, oyan inendet ne kiiyogu Jehovah”** (Johana 6:28, 29). Kiinetis Kiptaiyat Jesu kogasak kole, **“Ngo moyani ole a inendet, obegu eng’ tengekwojikwok”** (Johana 8:24).

Ne bo tai ko nyolu kenai iman kele kigebwanji lapkeiyet ak kenyoru sobondab koigeny. Ye ibata noto keboisie koboto Jesu kimutu bik alak kobwanji Lapkeiyet. **“Amoboisie agobo amitwogik che begu, ago oboisie agobo amitwogik che tebyei agoi sobondab koigeny, che konok Weritab chi: amu kigong’och inendet Kwanda, ne inendet ko Jehovah”** (Johana 6:27).

Tos ibwati agobo kipkoratiat eng’ atindiot ne kogesoman? Kimwachi bik chun alak eng’ nyiganatet kit ne kayachi Jesu inendet. Nga kitoorta inendet kwo sang’ icheget che kigoriotin eng’ tamirmiriet, ko kiibwati Jesu inendet ak kinyo koborjigei inendet kosiir eng’ tai. Yaun ko u nito aginye kora!

ATINDIOT 15. JESU KO MESTOWOT NE MIE



Johana 10:1-16, 27-33

¹Amwawok, iman, iman, ale, Chorin ak ko rebin inendet ne mabunei kurgetab biutab kechirek, ne lanyei oldo age. ²Ago mestowotab kechirek inendet ne bunei kurget. ³Yatyin inendet ribindetab kurget; ak kasei kechirek kutinnyi: ak kuurei kechirekyik eng' kainai-kwak, ak kondoe ichek. ⁴Ak ye kagomaanda inendet chechiget tugul koba sang', kondoe, ak kosub kechirek inendet: amu ingen kutinnyi. ⁵Ak machamei kosub toondet, ago mwee: amu manaei kususwekab toek... ⁷Kolenji anyun Jesu ichek kogeny, Amwawok,

iman, iman, ale, A kurgetab kechirek. ⁸Chorik ak ko rebik tugul che kiindounena: ago ma kas kechirek ichek. ⁹A kurget: ngwo chi age tugul go ne buna ane, kesoru, ak kwo go, ak komanda sang', ak konyor ole ki-yage. ¹⁰Nyonei chorindet si kochor, ak kobar, ak kong'em kityo: kianyo si kobiit konyor sobondo, ak kotepto sobonato inne. ¹¹A mestowot ne mie: igoitoi mestowot ne mie sobondanyi agobo kechirek. ¹²Ago inendet ne otwogin, ne ma mestowot, ne ma chitab kobo kechirek, kogeerei konyonei suiyot, ak kobagakta kechirek, ak komwei, ak konam anyun suiyot ichek, ak koiyesta: ¹³komwei inendet amu otwogin, ak mamage kiy kechirek. ¹⁴A mestowot ne mie; ak angen chechuk, ak kongena chechuk, ¹⁵ko u ye ingena Kwanda, ak angen Kwanda; ak agoitoi sobondanyu agobo kechirek. ¹⁶Ak atinye kechirek alak, che ma bo biuni: kanyol aget choto agichek, si kogas kutinnyu: ak koek akwet agenge, ak mestowot agenge.

²⁷Kasei kutinnyu kechirekyuk, ak angen ichek, ak kosu-

ba: ²⁸ak agochini ichek sobondab koigeny; ak magoi lusyo, ama rebena chi ichek eng' eunnyu. ²⁹O Baba, ne kigona ichek, kosiir tugul; ama mi chi ne imuchi koreb ichek eng' eutab Baba. ³⁰Ane ak Kwanda, ko ki agenge. ³¹Kinam anyun Yahudik koik kogeny kolen

kolach inendet. ³²Kowolji Jesu kolenji, Koaboruok boisiosiek che chang' che miach che bunu Kwanda; olacha agobo boisio nee eng' choto? ³³Kowolji Yahudik inendet kolenji, Magilachin amu boisiet ne mie, ago amu chotiset; ak amu inye ne i chi, iyaege iegu Jehovah.

Lesoniesiek che bunu Atindiondonito

1. *Jesu ko kurget Inegei ne bo yetunet.* Kiegu kechirekyik iman ye kigase kutinnyi ak kisubi Inendet Inegei. Kuurin Inendet eng' kaineng'ung', indoun, imutyinin ole mi suswek che nyalilen, ak kogonin Inendet sobondo. "Ki u achek tugul kechirek che kigobetyo; kigosub age tugul eng' achek orennyi; ak kigonde Jehovah inendet tengekwoikyok achek tugul" (Isaia 53:6). Tos kiiweege eng' oreng'ung' si isub orennyi?

2. *Jesu ko Mestowot Inegei ne bo iman.* "Amu inendet Kamuktaindenyo, Ak ki bik che bo akwennyi, kechirekab eunnyi" (Tienwogikab Kalosunet 95:7a). "Onai ole Jehovah ko Kamuktaindet: Inendet ne kiyaech, ak ki chechik; Ki bikyik, ak ki kechirekab akwennyi" (Tienwogikab Kalosunet 100:3).

3. *Ye ki kechirekyik, kongenech Inendet ak kingen Inendet.* "Ago ingena, ee Jehovah; igeera, itieme muguleldanyu koto-kyingei" (Jeremia 12:3a). *Tos ingen Jesu ko Mestowondeng'ung'?* Ngot ko u noto, isubi Inendet Inegei. *Tos ingenin Mestowondet?* "Ye tun took Mestowot ne o," komwachin che chang' kolenjin, "Kiptaiyat, Kiptaiyat, kima kiyai maonatet eng' kaineng'ung', ak kigion oik eng' kaineng'ung', ak kigiyai eng' kaineng'ung' boisionik che chang' che bo kimnatet?" Kole Jesu, "Ak amwachi anyun ichek eng' yoto kotook, alenji, Mangingok koboch agoi: oistoenage okwek che oyae yaitio" (Matayo 7:22, 23). Magimuchi kebunji Mestowondet ak kisub orennyo kora. Ngo matinyei chi tililindo ko maimuchi kogeer Kiptaiyat (Hebranik 12:14).

4. *Ngot kebo Kristo Jesu, ko kigesoruech koigeny.* Maimuchi chi anyun korebech eng' eunnyi. Kigochin anyun kayomisonito icheget ichegei che isubi "Mestowot ne o ne bo kechirek," noto Kiptaiyat Jesu Kristo.

5. *Inendet ne isubi Jesu komwee kutuswekab toek.* Setani ko u chorindet, ne nyonei si kochor, ak kobar, ak kong'em.

6. *Kimwa Jesu kole Inendet ko Jehovah.* Kimwa Yahudik kole yaegei Jesu kogergeit ak Jehovah ye kingomwa kole Inendet ko Mestowot ne mie ak kole Inendet ak Kwanda ko agenge. Nda kiisubi Jehovah ichek, ta kiga konai Jesu koek Mestowondenywa. Kimaoten Isaia kole, "**Ogeero, nyonei Kiptaiyat Jehovah ko u inendet ne kim, ak kobounisiei eunnyi agobo inendet: ogeero, mi melektanyi koboto inendet, ak mi yaaktaennyi tainnyi. Baei kechirekyik ko u mestowot, iyumi eunnyi arekab kechir, ak komute tegennyi, ak kondochi mutyo che aboen**" (Isaia 40:10, 11).

Tiendo ne bo Mestowot

Tienwogikab Kalosunet 23

¹Jehovah mestowondennyu; m-ararua kiy. ²Kona arue ole mi suswek che nyalilen; Indoiywa awa ole mi beekab kalyet. ³Isoobi sobondanyu: Indoiywa abun ortinwekab imanda agobo kainennyi. ⁴Ee, agot ngabune atebwetab uruetab meet, Ko maiywei yaitio; amu imi kobota: lgaigaa kiroktang'ung' ak siaring'ung'. ⁵litoi meset eng' tainnyu eng' ole mi bunikyuk: Kaiile metinnyu mwaita: kagonyi kikombennyu kot kong'irtagei. ⁶Isubota iman mieindo ak chamnyet ne tala betusiek tugul kote asobe: Ak atebe gotab Jehovah koigeny.



ATINDIOT 16. JESU KO NG'EETYET AK SOBONDO

Johana 11:1-7, 17-46

¹Ak kimian chito age ne ki-guure Lasaro, ne bo Betania, ne bo nganasetab Maria ak chepkamet Marta. ²Ak ki Maria nito ne kiil Kiptaiyat eng' mwaita, ak kouuse kelyekyik sumeekyik, ne kitinyei ng'etab kamet, Lasaro, ne kimian. ³Kii-yokyi chepkametwagichato inendet ng'olyot, kolenji, Kiptaiyandani, keero, miani inendet ne ichame. ⁴Ago ye kingogas Jesu noto, kole, Ma bo meet mianoto, ago bo torornatetab Jehovah, ak kilosune Weritab Jehovah noto.

⁵Ak kichamei Jesu Marta, ak chepkamet, ak Lasaro. ⁶Kingogas anyun kole miani, kota kotebi betusiek aeng' eng' ole kimi. ⁷Kingobata nito anyun, kolenji alamalyet, Ongebe Judea kogeny.

¹⁷Ye kingoit Jesu anyun, konyor kole kiga kotebe kererit betusiek ang'wan. ¹⁸Ki negite Betania Jerusalem, ki bo olo bo maelisiek aeng'; ¹⁹ak kigabwanyi che chang' che bo Yahudik Marta ak Maria si kogaigai ichek agobo ng'etab kamet. ²⁰Kingogas anyun Marta kole, nyonei Jesu, kwo kotorokta inendet; ago kita kotebi Maria

eng' go. ²¹Kolenji Marta anyun Jesu, Kiptaiyandani, nda kiimi yu, ta kima komeei werit ne kitupche. ²²Ago angen agot nguno ale, kit age tugul ne isome Jehovah, kogonin Jehovah. ²³Kolenji Jesu inendet, Ta kong'eetei ng'etab komet. ²⁴Kolenji Marta inendet, Angen ale ng'eetei eng' ng'eetyet ne bo betutab let. ²⁵Kolenji Jesu, A ng'eetyet, ak sobondo: inendet ne iyana, agot ngo me, ko ta kosobei: ²⁶ak chi age tugul ne sobei ak koyana ko mameei matiny. Tos iyani inye nito? ²⁷Kolenji, Wei, Kiptaiyandani; kaayan ale i Kristo, Weritab Jehovah, ne nyonei ng'ony.

²⁸Ak ye kingo kagomwa nito cheboto, kwo, ak koguur Maria, chepkamet, eng' ung'ot, kole, Mitei yu Konetindet; kuurin. ²⁹Ak ye kingogas noto, kong'eet kochakta kwo ole mi inendet. ³⁰(Ago kitomo koit Jesu nganasanato, ago kita komi ole kiga tuiyechi ak Marta.) ³¹Kiisub anyun Yahudik cheboto, icheget che kimi koboto inendet eng' go kogoigoi, ye kingogeer kong'eet Maria, ak kochakta komanda sang', ko-

len wendi kererit korirei eng' oloto. ³²Ye kingoit anyun Maria ole mi Jesu, ak kogeer inendet, kobutyi kelyekyik, ak kolenji, Kiptaiyandani, nda kiimi yu, ta kima komeei werit ne kitupche.

³³Ye kingooger Jesu anyun inendet korirei, ak korirtos agichek Yahudik che kigabwa koboto inendet, kogas king'wan eng' tamirmiriet, koarogen, ³⁴ak kole, Kionde ano? Kolenji, Nyo, Kiptaiyandani, keer.

³⁵Korir Jesu. ³⁶Kole anyun Yahudik, Ogeer anyun-o ole kichamdoi inendet! ³⁷Ago kile alak eng' ichek, Kiga temene chichi, ne kiyatei konyekab chito ne ki korat, koger si mame agine chichi? ³⁸Kogas anyun Jesu king'wan kogeny eng' orinnyi konyonei kererit. Ki kebenet, ak kigigere koita kurget. ³⁹Kole Jesu, Oiste koita. Kolenji Marta, chepkame-tab inendet ne kime, Kiptaiyandani, kogobul: amu koboch ngome ko betusiek ang'wan. ⁴⁰Kolenji Jesu inendet, Kama amwaun, ale, ngiyani, igeere torornatetab Jehovah? ⁴¹Koisto anyun koita. Ak kiyot met Jesu ak kole, Baba, amwaun kongoi ale kaigasa. ⁴²Ak kaa-

nai ale igasa eng' ui tugul: ago kaamwa ni amu tuiyoni tononi eng' yuto, si kobiit koyan kole kiiyokwa. ⁴³Ak ye kingo kagomwa ko u noto, komwa eng' kutit ne o, kole, Lasaro, mong'u. ⁴⁴Komong' anyun inendet ne kiga me, ko ratotin eunek ak kelyek eng' ngoroik che bo kererit; ak kiga kirate togennyi anget. Kolenji Jesu bichoto, Otiach, ak ounde kwo. ⁴⁵Kiiyan anyun inendet che chang' che bo Yahudik che kigabwa ole mi Maria, ak kogeer tuguk che kayai Jesu. ⁴⁶Ago kiba alak ole mi Parisaik, ak komwachi ichek tuguk che kagoyai Jesu.

Johana 5:25, 26

²⁵Amwawok, iman, iman, ale, Nyonei sait, ak kagoit, ye kas che kigobek kutitab Weritab Jehovah; ak soptos iche-



get che kasei. ²⁶Amu ko u ye ti- u noto kigogochi Werit kote-
nye! Kwanda sobondo inegei, pto sobondo.

Kit ne Kibwatoti

Tos ma mie ye kingen kele kichamei mising' inne Jesu choronokyik? I choruennyi aginye ngot iyai tuguk che ng'atin Inendet (Johana 15:14). Kisomani eng' atindiondoni kele kitinyei arogenet choronok alak che ki bo Jesu. Kiga kome tupchet Lasaro. Kitoogu eng' tai ko u ne kima mage kiy Jesu kotoret ichek. Tos ngab ibwat ile ma ibwatin Jehovah eng' kaiimutik che bwanjinin? Ago anyun maruei Jehovah. Tinyei chobet Inendet kotugul. Nyolu kimang'u Inendet kotugul koyai kiy age tugul eng' achek ne igochin torornatet Jehovah.

Tinyei kora Jehovah chobet agobo inye. Machei koyain Inendet si igergeitu ak itondab Werinnyi, Jesu. **“Ak kingen kele, eng' ichek che chamei Jehovah, kotuitos tuguk tugul si kobois koreu che miach eng' ichek che kigeguur ko u magennyi. Amu Jehovah ne kisib konai ichek, ko inendet ne kisib kolewen ichek si kogergeit ak itondab Werinnyi, si koek ne bo tai eng' che tupcho che chang’”** (Romanik 8:28, 29). Kinyoru anyun nyalilwogik betusiek alak, amu noto. **“Si kenyor eng' kalosunet ak torornatet ak teegisto, tiemet ne chamaksei ne bo kayaneng'wong', ne tinyei kamanutiet ne o kosiir ne bo tahabu che betos nganda kitiemei eng' mat, eng' ng'ang'et ne bo Jesu Kristo”** (1 Petero 1:7).

Kimachei Jesu konet Maria ak Marta agot achek kora kole, ye kiyani Inendet ko ma kibegu. Ye begu ichek che iyani Jesu ko **“kamanda eng' borto”** ak **“kotebi koboto Kiptaiyat”** (2 Korintoek 5:8).

Kiibor kora Kiptaiyat Jesu kole imuchi komong' chi eng' che kibek koguurei kainennyi. [Kigas Lasaro koguurei Jesu inendet, ak kisob.] Ye nyo Jesu ng'onnyuni kogeny, **“kogas che kigobek kutitab Weritab Jehovah; ak soptos icheget che kasei”** (Johana 5:25).

Igongonyi Jesu kurgotikab mugulelwek agot nguno. **“Ngo**

kas chi kutinnyu ak koyat kurget, awendi ole mi inendet” (Ng’ang’utiet 3:20). Icheget che kasei kutinnyi ak koyat koegu bik che leelach. **“Ak kigosobok okwek, ye kio begunotin eng’ yaitwogikwok ak tengekwojikwok”** (Epesoek 2:1). **“Ko u noto oiityige ak okwek ole kiobekyi tengek, ago osoptosi eng’ Jehovah eng’ Kristo Jesu. Noto anyun amochamji tengek ko-boi borwekwok che begu, si ogas it magutikwak: anan ogochi tengek kebeberwekab borwekwok koek karik che ma bo iman; ago ogochige Jehovah, ko u che soptos che kamong’une che kibek, ak ogochi Jehovah kebeberwekab borwekwok koek kari-kab imanda”** (Romanik 6:11-13).

Kimachei Kasetab it Kwong’utionito

Tos kanyol koyai Jesu kwong’utiet si inyoru toretet eng’ bi-chiindang’ung’? Imuchi kochamji Jesu tuguk che chang’ che bichien kobwanji sobeng’ung’ “agobo torornatetab Jehovah.” Ago mat iutie anyun ile chamin Inendet ko u ye kichamei Marta ak Maria. Abere chobei Inendet koyaun kwong’utiet ne mema-ng’u. Ago keer anyun ile kimachei kasetab it kwong’utionito bo sobondo ne leel. Kole Jesu, “Oiste koita.” Kigas it ichek ng’olyondonoto agot nda kiibwati kole ki berberindo. Kingo-mong’ Lasaro eng’ che kibek, kole Jesu, “Otiach, ak ounde kwo.”

Nyolu kegas it agachek agot eng’ tuguk che mengechen che mwawech Tamirmiriet ne Tilil keyai, si kegeer torornatet ne bo kamugetab Jehovah. Ngot ko mi chi ne nyolu kesom nyoetab kaat agot nda ming’in mising’ lelutiennyo, ko nyolu keyai ko u noto. Sait age ko koita noto ne magat keisto si koyai Jesu kwong’utiet eng’ muguleldab chito nin age. Ak ye yai’wech Jesu kwong’utiet, ko mie ketoret eng’ chamnyet kitiach alak che ta ko ratotin. Tos ma kwong’et ye kichamji Jesu choronokyik kotoret Inendet ye kiyaei kwong’utionoto?



ATINDIOT 17. KOCHOBEI KAPKIRUOGET KOBAR JESU

Johana 11:47-53

⁴⁷Kiguur anyun kiruoget ti-siik che eechen ak Parisaik, ak kole, Kiyai nee? amu yaei chichi kaborunoik che chang'.
⁴⁸Ngot kebagakte inendet ko u ni, koyani inendet bik tugul: asi kobwa Romanik korebenech emennoyo ak bororiennyo.
⁴⁹Ak kilenji age eng' ichek, ne inendet ko Kaiapa ne ki tisiindet ne o kenynoto, Mongen okwek kiy age tugul, ⁵⁰mongen

ole mieitu eng' okwek ngo mechi bik chito agenge, si ma bet bororiet komugul. ⁵¹Kima komwaei inegei noto: ago kimaoten amu ki tisiindet ne o kenynoto, kole, komechi Jesu bororiet; ⁵²ma agobo bororiet inegei, ago si kobiit koyum lagokab Jehovah che yestootin si kobiit koek agenge. ⁵³Koboch betunoto anyun ak kwo tai, koruogot agobo ole bartoi inendet.

Keesioi Laitoriat

Kiga kogeer kapkiruogetab Yahudik kwong'utik che kiyai Jesu. Kiga kogas konetisiei kolen agenge Inendet ak Kwandanyi ak ko kimi Inendet kotom kobiit Abraham (Johana 8:58). Ago kimaiyan ichek kole Jesu ko Laitoriat ne kigiyoumsiyi Israel.

Inetech anyun atindiondoni kole kimacham kandoicheb Yahudik kobagakta etunatenywa. Ki kergeri ichek ak otwogik che yaachen che kimwa Jesu eng' kalewenennyi. Kimwa otwogichoto kole, "**Magimache chichi koboiywech**" (Luka 19:14). Ko u noto anyun, ko kitil Yahudik kome chito agenge— noto Jesu— si ma bet bororiet komugul. Ago nga u noto, ko kima komuchi koyai kiy nda kima igoito Jesu sobondanyi eng' chamnyet ne ige-sunotgei.

Kichob Jehovah agot kotom keyai ng'ony, ma kesor bororietab Israel inegei, ago ng'ony komugul! "**Ago kicham Jehovah koguoten inendet; kiigochi aroget; ye tun iyai sobondanyi koek kagochinet agobo tengekto, tun keerei iyotennyi, tun te-sei betusiekyik, ak kotesak chametab Jehovah eng' eunnyi**" (Isaia 53:10).

ATINDIOT 18. ATINDIOT AGOBO KONUNOTIOT NE BO KAMANUTIET NE O



Johana 12:1-8

¹Ak kingota komi betusiek lo si koit paska konyo Jesu Betania, ole kimi Lasaro, ne kiing'eeiti Jesu komong' eng' che kibek. ²Kichopchi ichek eng' oloto inendet amitwogik che bo lagat: koboisiechi Marta;

ago kimi Lasaro koboto ichek che kiamisieie ak inendet. ³Kiinem anyun Maria mwaita ne nyamdut ne bo ratilit agenge, ne bo kamanutiet ne o, ak koiile kelyekab Jesu, ak kouuse sumeekyik kelyekyik: ak kinyi got nyamdutiet ne bo mwaata. ⁴Ago kile Judas Iskariot, ne ki agenge ne bo alamalyennyi, ne kimachei kong'wekta inendet, ⁵Ko amu nee si ma kialdae mwai denarisiek bogol somok, si kigochi kibananok? ⁶Kimwa ni anyun, ma amu kirire kibananok; ago amu ki chorin, ak kitinyei lolet, ak kiubei tuguk che mi orit. ⁷Kole Jesu, Obagakte kogonorji betutab tubennyu. ⁸Amu mi kibananok kobotok kotugul; ago mami ane ak okwek kotugul.

Nyoljin Jesu Teegisto Tugul

Ye kingong'eeit Jesu Lasaro komong' eng' che kibek, kotil kapkirusogotab Yahudik kole nyoljin Inendet kome. Kichopchi Jesu choronokyik amitwogik che bo lagat ak kiiborji Inendet teegisto. Kinai anyun Maria iman kole ng'o Jesu. Kiigochi chamnyennyi kochamda mwaita ne bo kamanutiet ne o-abere kiyamegei ak meleкто ne bo betusiek 300 ngealda. Kiga koguiyo Maria ng'alekab Jesu che kimwa kole negit kigartat (Matayo 26:2).

Iboruech Johana ole u kipsengwet, ye tun tuiyo tugul che kigesor kobun oret age tugul ne bo gab chi, Kutit age tugul, bik

ak bororiet age tugul koboto malaikaisiek elfusiek taman konyil elfusiek taman si kolos Jesu, **“Komwaei eng’ kutit ne o kole, Nyoljin Aruet ne kigibar konyor kimnatet, ak magornatosiek ak ng’omnatet, ak kamuktaet, ak teegisto, ak torornatet, ak kaberuret”** (Ng’ang’utiet 5:12). Nyoljin Jesu torornatet tugul ak teegisto che te che kimuchi kigochi lnendet!

Kagochinoik che Kimuchi Kigochi Jesu

Nee ne kimuchi kigochi Jesu koek kalosunennyo ne o? Mwaei Paulo kole, **“Noto anyun che kitupche, asomok mising’, eng’ rirenosiekab Jehovah ale, ogoite borwekwok koek tiseiywot ne sobei, ne tilil, ne taachaksei eng’ Jehovah, noto ko boisieng’wong’ ne nyolu. Amoyaniege ateptab betusiechu: ago ingewalak eng’ kaleelitatab kabwatutikwok, si kobiit onai komie maget ne mie, ne taachaksei ak kogesunotgei, ne bo Jehovah”** (Romanik 12:1-2). Ongigochi Jesu borwekyok si kibaibai lnendet eng’ sobennyo. Ongigochi lnendet nautikyok, kibwatate kainennyi, Ng’olyondennyi ak boisionikyik ne kata kibwati agobo tugukab ng’onyuni.

Mi alak iman che ibwati kole ibeeti buch betusiekab sobeng’ung’ ak konunoiguk ye iboisiechini Jehovah. Tos kima ibwat Judas kole kiboisie buch Maria kagochinennyi? Ago mi ano Judas nguno? **“Iberurot kabwatetab ne bo iman; Ago nunei kainetab kiptengeginik”** (Kalewenaik 10:7). **“Kibwati ne bo iman koigeny”** (Tienwogikab Kalosunet 112:6b).

Ye kiborji chamnyet ichek che kitupche eng’ Kristo, kegonyiti Kristo ne menyei ichek. Tos iyachini sigiguk che Kristianik, koboto manong’otiot anan ko osotiondeng’ung’ anan lagoguk ko u ye iyachini Jesu? Kigonyiti kora Jesu ye kichame buni-kyok, amu kimwawech lnendet keyai ko u noto (Matayo 5:44).

Kichamech Kristo kot kogoitogei agobo achek, **“koek kagochinet ak tiseiywot eng’ Jehovah ne ng’uu ne nyamdut”** (Epesoek 5:2). **“Noto anyun ongigochi Jehovah eng’ inendet korosiotab kalosunet kotugul, noto ko logoiyatab kutuswek che ng’anyei kainennyi”** (Hebranik 13:15).

ATINDIOT 19. ATINDIOT AGOBO LAITORIAT NE IMING'INEGEI



Johana 12:12-16

¹²Ak eng' betut ne kiisubi noto, ye kingogas tuiyet ne o ne bo bik che kigabwa igorta, kole nyonei Jesu Jerusalem,

¹³konam temenik che bo sosik, ak koba kotorokta inendet, ak komwa eng' kutit ne o kole, Hosanna: Iberurot inendet ne nyonei eng' kainetab Kiptaiyat, noto Laitoriatab Israel. ¹⁴Ak ye kingo kagonyor Jesu moitab sigiriet, kolany; ko u ye kigisir kele, ¹⁵Ameiywei, inye, ee, cheptab Sion: keero, nyonei Laitoriandeng'ung', kobunu moitab sigiriet. ¹⁶Kima iguiyo alamalyennyi eng' tai tugu-chuto: ago kingo kagitoror Jesu, kobwat anyun ichek kole kigisir tuguchuto agobo inendet, ak kiga keyachi inendet tuguchuto.

Nyonei Jesu kogeny ko Laitoriat ne Kagitoror

Kimwa maotiot eng' Arurutiet ne bo Keny kole, "Baibaitu mising', ee cheptab Sion; waach, ee cheptab Jerusalem: Keero, nyonjinin laitoriandeng'ung': bo iman inendet, ak kotinyei yetunet; iming'inegei, ak kolong'onu sigiriet, moitab sigiriet ne kirgit" (Sekaria 9:9). Ee, kisib komwa iman maotik agobo nyonunetab Jesu ne kinyo koek chi, ak konam atebetab otwogin ak koek Yetindet. Kiisulda maonatosiek che siirei 300 eng' sobetab Jesu, meet ak ng'eetyennyi. Ago nyolu kosulda che chang' kosiir chuto ye tom konyo Jesu kobounis eng' ng'onnyuni kenysisiek 1,000 (Ng'ang'utiet 20:4).

"Amu chorugei Kiptaiyat inendet eng' kipsengwet, koboto twegunet ne o, ak kutitab malaikaiyat ne o, ak iriagetab Jehovah: ak isib kong'eetos che kibek eng' Kristo: ak achek anyun che kisoptosi, che ki ng'etunotin, keganabech koboto ichek

che kigobetyo amu Kristo. Si kobiit anai inendet, ak kamuktaet ne bo ng'eetyennyi" (Pilipik 3:7, 10a).

Ye kigase it Kristo konyolu kobek magutik alak che bo chi. Ye mee magetab chi, konyor anyun boroindo kamugetab Kristo ne mitech. Kiiti kele kigigartat chinnyo ne bo keny koboto Kristo; ak sobei chito ne leel eng' kayanet ye kibendote, kasetab it. **"Kigigartata koboto Kristo; ago asobe; ago ma ko ane, ago sobei Kristo eng' ane: ak sobondo ne asobe nguno eng' borto asobe eng' kayanet ne mitei eng' Weritab Jehovah, ne kichama, ak kiigoitogei agobo ane"** (Galatiek 2:20). **"Amu ngosubi borto, obegu matiny; ago ngobar eng' Tamirmiriet boisionikab borto, osoptosi"** (Romanik 8:13). Igochi boroindo Tamirmirietab Jehovah kondoun eng' tuguk che nyolu ibar eng' sobondang'ung': Abere atepto ne ya, anan ko kabwatutik che ma bo iman? Ye ilewen ibar tuguchoto ak igas it, kondoun anyun kimnatetab Jehovah eng' sobet ne leel: kogonin kamuget si inam atebosiek che leelach, kabwatutik che leelach, ak inyoru katerterisiet eng' sobeng'ung'. **"Amu Jehovah ne boisiei eng' okwek si omach, ak oboisie agine, agobo magennyi ne mie"** (Pilipik 2:13).

ATINDIOT 21. KONETISIE JESU KABORUNET AK NG'ATUTIK

Johana 13:3-17, 34, 35

³Ko kagonai Jesu kole kagonde Kwanda tuguk tugul eunekyik, ak kole kibunu Jehovah ak wendi ole mi Jehovah, ⁴kong'eet eng' amitwogik, ak konde taban ngoroikyik, ak konam anget ne kiuusegei, kogermenegei. ⁵Ak korong'ji beek sanit, ak kotoi koun kelyekab alamalyet, ak kouuse anganato kiga kermenegei. ⁶Konyo anyun ole mi Simon



Petero. Yeityo kolenji Petero, Kiptaiyandani, tos iuni inye

kelyekyuk? ⁷Kowolji Jesu inendet kolenji, Kit ne ayae, ko mengen nguno; ago tatun inae. ⁸Kolenji Petero, Magoi iun kelyekyuk. Kowolji Jesu kolenji, Ngo maunin, ko magiting'ege kiy. ⁹Kolenji Simon Petero inendet, Kiptaiyandani, ma kelyekyuk kityo, ago eunekyuk agichek ak metinnyu. ¹⁰Kolenji Jesu inendet, Inendet ne kagoungei ko ma komachei koungei kogeny, kobate kelyekyik, amu iunot inne: ak ounotin okwek, ago ma okwek tugul. ¹¹Amu kiingen ne kima chei kong'wekta inendet; kimwa amu noto kole, Ma ounotin tugul. ¹²Ak ye kingo kagoun anyun kelyekwak, ak konem ngoroikyik, ak koteb

ng'onny kogeny, kolenji, Tos ongen ne kayaiywok? ¹³Oguurena Konetindet, ak Kiptaiyat: ak omwae komie; amu a inendet. ¹⁴Ngo ane anyun ne a Kiptaiyat ak Konetindet, ne kaun kelyekwok, ko kanyoljok ak okwek ounjige kelyek. ¹⁵Amu kaboruok, si oyai ak okwek ko u ne kayaiywok. ¹⁶Amwawok, iman, iman, ale, Ma o otwogindet kosiir kiptaiyandennyi; ama o inendet ne kigiyok kosiir inendet ne kiinyogu. ¹⁷Ngonai tuguchuto, ko oboiboi ngoyai.

³⁴Agonok ng'atutiet ne leel, ale, ochamnye; ko u ye kiachamak, ochamnye ak okwek. ³⁵Naei bik tugul kole o alama lyennyu, ngochamdosi.

Kit ne Kiyaei

Nee tuguk aeng' che kiinetisie Jesu kaborunennyi?

1. Kimwa kole, "Ngo ane anyun ne a Kiptaiyat ak Konetindet, ne _____, ko kanyoljok ak okwek _____" (koitet 14).

2. Kimwa kora kole, "Ko u ye _____, _____ ak okwek" (34).

Ung'otiet ne bo Boiboiyet

Kimwa Jesu kole kiboiboi ngisub kaborunennyi ak keboisiechi bik alak. Kaborunet ne tia nito kegeer Yaindet kong'uruksei koyaei boisietab otwogindet: kouni kelyekab alamalyennyi amu

temburiekab betut! “Ingotebenok ateboni, ne kimi agine eng’ Kristo Jesu: ne, nganda kitinyei itondab Jehovah, ko ma iit kole kit ne bo kamanut ne o kole kogergeit ak Jehovah, ago kiyai-gei inendet koek buch ak konam itondab otwogindet, koge-geit ak bik; ak kingotook eng’ itondab chi, koming’ingei, kogas it agoi meet, ee, meet ne bo kimurtoiyot. Noto anyun, kiitoror Jehovah inendet mising’ . . .” (Pilipik 2:5-9a).

Ongegeer ortinwek che kimuchi keboisiechine bik alak, si ketoret eng’ tuguk che bononi. Ngeyai ko u noto ko kiboiboi. Toogu iman kele ki kasubikab Kristo ye kiboisiechini ak kecha-me bik alak, amu kiyaiywech Inendet ko u noto.

ATINDIOT 22. KAYOMISUTIK MUT CHE BO KWONG’ET

1. Johana 14:1-3, 6

¹Amogochi mugulelwekwok koiimgei: oyani Jehovah, oyana agane. ²Mitei gorik che chang’ eng’ gotab Baba; nda kima ko u noto, ta kiamwawok; awendi achobwok koret. ³Ak ye awe achobwok koret, anyone kogeny amutok; si ole ami omite ak okwek.

⁶Kolenji Jesu, A oret, ak iman, ak sobondo: manyonjin chi Kwanda, ama eng’ ane.

2. Johana 14:12

¹²Amwawok, iman, iman, ale, Inendet ne iyana, koyaei agine boisionik che ayae; ak koyaei boisionik che eech eng’ chuto; amu awendi ole mi Kwanda.

3. Johana 14:13, 14

¹³Ak kit age tugul ne osome eng’ kainennyu, ayae, si kegonyt Kwanda eng’ Werit. ¹⁴Ngot osom kiy age tugul eng’ kainennyu, ayae kioto.



4. Johana 14:15-17

¹⁵Ngot ochama, oribe ng'atutikyuk. ¹⁶Ak asom Kwanda, ak kogonok Kagaigaindet age, si kotebi kobotok koigeny, ¹⁷noto Tamirmiriet ne bo imanit: ne maimuchi ng'ony kotaach; amu mageerei inendet, ama naei inendet: ago ongen in-

ndet: amu tebyei kobotok, ak tun tebyei eng' oring'wong'.

5. Johana 14:27

²⁷Abagakwok kalyet; agonok kalyennyu: magonok ko u ye konu ng'ony. Amongoii-mgei mugulelwekwok, anan koiyweis.

1. Kiiyomis Jesu kole **chopchin koret** ichek che isubi Inendet (Johana 14:1-3, 6).

2. Kiiyomis Jesu **kimnatet ne o** amu kiwendi ole mi Kwanda. Imuchi Tamirmiriennyi ne menyei kayanik koyai boisionik che eechen che siirei choto kiyai Jesu ye kimi Inendet ko chito age-nge eng' ng'onyuni (Johana 14:12).

3. Kiiyomisiyi Jesu ichek che chechik **chamjinet ne o ne bo saet** (Johana 14:13, 14).

4. Kiiyomisiyi Jesu alamalyennyi kole iyokyin **Inendet ne tebyei koboto ichek koigeny**. Menyei Jesu eng' Tamirmiriet ne Tilil muguleldab chi age tugul ne iyani Inendet (Johana 14:15-17).

5. Kiiyomis Jesu **kalyet ne o** ne siirei ne konu ng'ony (Johana 14:27). Ma nyolu kiyweisie agot kitigin amu "**o inendet ne mi eng' okwek kosiir inendet ne mi ng'ony**" (1 Johana 4:4).

Kit ne Kiyaei

A. Soman kogeny koitosiechuto komie ko u yo ng'alalun Jesu. Sirji kartasit tuguk tugul che mwaei Jesu kole yaun Inendet anan Tamirmiriet ne Tilil.

B. Lewen koitosiek somok eng' Johana 14 che koinyorune toretet ne o ak inetge eng' metit. Sirji yu koitoisiechoto:



Johana 15:1-11

¹A ketit ne bo iman ne bo sabibuk, ak semberindet Baba. ²Tilei temet age tugul ne mi eng' ane ne maiyiei logoek, ak kotilili temet age tugul ne yiei logoek si koi logoek alak. ³O tililen nguno amu ng'alek che kaamwawok. ⁴Omenya, ak amenyok. Ko u ye maimuchi temet koi logoek inegei, ngot ko mamenyei ketit; ko momuchi ak okwek, ngot ko mome-

nya. ⁵A ketitab sabibuk, ko o temenik: inendet ne menya, ak amenye inendet, ko noto ne yiei logoek che chang': amu momuchi oyai kiy okwege ngo mami ane kobotok. ⁶Ngo mamenya chi, kewirtoi inendet ko u temetab ketit, si koyaam; ak koyum bik, ak kowirji ma, ak kolalyo. ⁷Ngot omenya, ak komyenok ng'alekyuk, osom anyun kiy age tugul ne omache, si keyaiywok. ⁸Kigonyiti Baba eng' nito, ye oiye logoek che chang'; si oegu alamalyennyu. ⁹Ko u ye kichama Kwanda, ko u noto kiachamak agane: otebi eng' chamnyennyu. ¹⁰Ngot oribe ng'atutikyuk, otebye anyun eng' chamnyennyu; ko u ye kiarib ng'atutik che bo Baba, ak atebye eng' chamnyenyi. ¹¹Kaamwawok tuguchu, si kotebi eng' okwek boiboiyennyu, si kobiit kosulda boiboiyeng'wong'.

Kemeny Kristo

Ngo kigenyuru nyoetab kaat ak katililet ak sobondo ne leel amu kayanet eng' Jesu, ko kanyol ketes tai kotugul eng' kimnatetab Tamirmiriet ne Tilil eng' sobennyo ne bo Kristo. Ma nyolu kibwat kele kimuchi kesopche eng' kimnatennyo anan ko eng' nautikyok. Kimwa Paulo kole, "**Tos kaga o berberen ko u noto? Ngo kiotau eng' Tamirmiriet, omache nguno oegu che ogesunotingei eng' borto?**" (Galatiek 3:3).

Nyoljin Jesu kotililech kotugul. Iboru nito kole sait age kimuchi kenyoru nyalilwogik anan tiemisiosiek. Ago yaei ko u noto amu makwech keiye logoek che chang'. **“Ma toogu kotigonet tugul kele bo boiboiyet eng' betunnyi; ago bo arogenet: ago ye ibata koiichi icheget che kinetegei noto, logoekab kalyet, choto ko logoekab imanda”** (Hebranik 12:11).

Nee Logoiyatab Tamirmiriet?

Mwawech Paulo kole, **“Ago logoiyotab Tamirmiriet ko chamnyet, boiboiyet, kalyet, muitaet, talasiet, mieindo, atepto ne kiyani, kaming'inetab ge, ribetab ge: mami ng'atutiet ne esioi chuto”** (Galatiek 5:22, 23). Tesei koiyiei sobondang'ung' logoechuto kororon ye isom Jesu kotililin ak konyiitin Tamirmiriennyi betut age tugul. Logoekab imanda ko muguleldo ne mwaei kongoi ak kolosu, tamirmiriet ne iming'inegei, kemwachi bik alak agobo Jesu, kigoito tuguk agobo boisietab Jehovah, keboisie saisiek komie, kemwaita Ng'olyotab Jehovah eng' nyiganatet, ak ketaach wolunoikab saet.

Kateunet ne Korom

Iteiywech Jesu Kristo kole, ngo magimenye Inendet, ketilech ko u temenik, ak keyame, ak koyumech bik kondaech ma kelalye. Icheget che iytos logoek amu menyeyi eng' Kristo ko kasubikyik choto (koitosiek 6 ak 8). Ibwatwech Juda ne Kiyoktoi kole, **“Kingosor Kiptaiyat bik komong' eng' emetab Misri, eng' let kobar ichek che kima iyan”** (Juda 5).

Magimuchi keiye logoek achege. Mie kisiaige eng' Ng'olyotab Jehovah ko u kioit, ko u ye mwaei kole **“Osiage okwege, ngomi eng' kayanet; otiemge okwege”** (2 Korintoek 13:5). Ngot komenyech ng'alekab Kiptaiyat Jesu, ak kegase it kit ne mwawech Inendet, ketebye eng' chamnyennyi (Johana 15:10). Manyolu kiyweisie ye kingen kele menyech Tamirmirietab Kristo, amu kingen kele ki chechik ngo menyech Tamirmiriet ne Tilil. Nai ile chamnyet ko tiemutiet ne bo kamanut: **“Jehovah ko chamnyet; inendet ne menyeyi chamnyet komenyeyi Jehovah, ak komenyeyi Jehovah inendet”** (1 Johana 4:16b). Chamin Jehovah ne tia! Tebe chamnyonato.

ATINDIOT 24. CHE KIGILEWEN KOEK CHORONOK

Johana 15:11-17

¹¹Kaamwawok tuguchu, si kotebi eng' okwek boiboiennyu, si kobiit kosulda boiboienyeng'wong'. ¹²Ng'atutiennyu ni, ale ochamnye, ko u ye kiamchamak. ¹³Matinyei chi chamnyet ne siirei ni, ale kogoito chi sobondanyi agobo choronokyik. ¹⁴O choronokyuk, ngot oyai tuguk che ang'atok. ¹⁵Ma aguurenok otwogik; amu manaei otwogindet kit ne yaei ki-

ptaiyandennyi: ago kaagurenok choronok; amu kaang'ang'wok tuguk tugul che kiagase Baba.

¹⁶Kima olewena, ago kialewenok, ak kiandeak, ale obe ak oii logoek, si kobiit kotebi logoekwok: si kobiit kogonok Kwanda kit age tugul ne osome eng' kainennyu.

¹⁷Ang'atwok tuguchu, ale ochamnye.

ATINDIOT 25. INETECH JESU KOLE KINYORU USISIET

Johana 15:18-27

¹⁸Ngo wechok ng'ony, onai ole kigowecha kotom kowechok. ¹⁹Nda o bo ng'ony, ta chamei ng'ony chechik: ago amu mobo ng'ony, ago kialewenok eng' ng'ony, kowechok ng'ony anyun amu noto. ²⁰O-bwat ng'olyot ne kiamwawok, Masiirei otwogindet kiptaiyandennyi. Ngot ko kiusa ane, kousok ak okwek; ngot ko kinam ng'olyondennyu, konamei neng'wong' agine. ²¹Ago yaiywok tuguchu tugul agobo kainennyu, amu ma nai inendet ne kiiyokwa.

²²Nda kima anyo ang'alalji ichek, ta matinyei tengek: ago

nguno ko matinyei kit ne itiagegei agobo tengektanywa. ²³Inendet ne wecha ko kawech Baba agine.

²⁴Nda kima ayai eng' kwennywa boisionik che kima yai chito age, ta kima kotinyei tengek: ago nguno ko kagogee-rech ak kagowechech ane ak Baba. ²⁵Ago, si kosulda ng'olyot ne kigisir eng' Ng'atutikwak, kele, Kigowecha buch.

²⁶Ago ye kagoit Kagaigaindet, ne tun ayokwok kobunu Kwanda, Tamirmiriet ne bo imanit, ne bunu Kwanda, konyo kobaorianja: ²⁷ak obaoriani ak okwek, amu kiomi kobota koboch taunet.

¹Kaamwawok tuguchu, si ma kinachak. ²Onok eng' sunagogisiek: ee, nyonei sait, ne ibwati chi tugul ne barok kole, Ayachini Jehovah boisiet. ³Ak yaei tuguchu, amu ma nai Kwanda, anan ane. ⁴Ago kaamwawok tuguchu, si ye nyo sai-

nywa, omuchi obwat ole kiamwawok agobo chuto.

³³Kaamwawok tuguchu, si kobiit onyorunena kalyet. Oti-nye nyalilda eng' ng'ony: ago onyiganitu; amu kaaterter ng'ony.

Kit ne Kiyaei

1. Wechei Kristianik ng'ony amu ma bo _____ ichek (15:19).
2. Kimwa Jesu kole, "Inendet ne wecha ko kawech _____ agine" (15:23).
3. Nga kiyai Jesu boisionik che chang' che kikwong'e eng' taitab ichek che maiyani ko kimwa Jesu kole " _____ ak _____ ane ak Baba" (15:24).
4. Wechei ng'onyuni Jesu _____ (15:25).
5. Nyonei sait ne ibwati ichek che _____ Kristianik kole yachin _____ boisiet (16:2).
6. Yaei ichek tuguchuto yaachen amu ma _____ Kwanda anan ko Jesu (16:3).
7. Nga kitinye nyalilda eng' ng'ony, kimuchi keboiboitu, amu kile Jesu _____ ng'ony (16:33).

ATINDIOT 26. SAIWECH JESU

Johana 17:1-11, 13-26

¹Kimwa Jesu ng'alechu; ak konyal kipsengwet, ak kole, Baba, kagonyo sait; itoror Wering'ung', si kotororin Werit; ²ko u ye kiigochi inendet kimnatet koboi bik tugul, si ko-

biit kogochi sobondab koigeny tugul che kiigochi inendet. ³Ak ni sobondab koigeny, ale konain Jehovah ne inyendet inyege ne bo iman, ak Jesu Kristo, ne kiyyogu. ⁴Kiatororin eng' ng'ony, amu kaagesu boisiet

ne kiigona ayai. ⁵Ak nguno, ee Baba, itorora eng' inyendet inyege eng' torornatet ne kiatinge kemi tuwai kotom kobiit ng'ony. ⁶Kiaborji kaineng'ung' bik che kiigona eng' ng'ony: ki cheguk, ak kiigona; ak kigorib ng'olyondeng'ung'. ⁷Kagonai nguno kole bunun tuguk tugul che kiigona; ⁸amu kiagochi ichek ng'alek che kiigona ak kigotaach, ak kigonai iman kole kiabunu ole imi, ak kigoyan kole kiiyokwa. ⁹Asae agobo ichek: masae agobo ng'ony, ago agobo ichek che kiigona; amu cheguk: ¹⁰ak tuguk tugul chechuk ko cheguk, ak cheguk ko chechuk: ak kiitorora eng' ichek. ¹¹Ak ma amite ng'ony, ago mi ng'ony chu, ak anyone ole imi. Baba ne Tilil, rib eng' kaineng'ung' ichek che kiigona, si kobiit koek agenge, ko u achek.

¹³Ak kanyonjin nguno; ak amwae tuguchu eng' ng'ony, si kobiit kosulda boiboyennyu eng' ichek. ¹⁴Kiagochi ng'olyondeng'ung'; ak kawech ng'ony ichek, amu ma bo ng'ony, ko u ye ma bo ng'ony ane. ¹⁵Masae ale imut ichek eng' ng'ony, ago ale irib ichek eng' inendet ne ya. ¹⁶Ma bo ng'ony ichek, ko u ye ma bo ng'ony ane. ¹⁷Itilil



ichek eng' imanit: imanit ng'olyondeng'ung'. ¹⁸Ko u ye kiiyokwa anyo ng'ony, ko u noto kaayokte ichek koba ng'ony. ¹⁹Ak atabanige agobo ichek si kobiit kitaban ichek eng' imanit. ²⁰Amasae agobo chu kityo, ago asae agobo ichek che tun iyana amu ng'olyondenywa; ²¹si kobiit koek ichek tugul agenge; ko u ye imi inye Baba, eng' ane, ak ane eng' inye, si kobiit koteb ichek eng' achek: si kobiit koyan ng'ony kole kiiyokwa. ²²Ak kaagochi ichek torornatet ne kiigona; si kobiit koek agenge ko u ye ki agenge achek; ²³ane eng' ichek, ak inye eng' ane, si kobiit koek ichek che igesuno-

tingei eng' agenge; si kobiit konai ng'ony kole kiiyokwa, ak ichame ichek, ko u ye ichama. ²⁴Baba, amache ale kotebi kobota eng' ole ami, ichek che kiigona; si kobiit kogeer torornatennyu ne kiigona; amu kii-chama kotomo kelumda ng'o-

ny. ²³Ee Baba ne bo imanda, kima kongenin ng'ony, ago kiangenin; ak kigonai chu kole kiiyokwa; ²⁶ak kiang'ang'ji ichek kaineng'ung', ak ta ang'ang'jini; si kobiit kotebe ichek chamnyet ne kiichamena, ak ane eng' ichek.

Saun Jesu

Kimaoten maotiot Isaia kole **"Kisa [Mesia] agobo bistoik"** (Isaia 53:12). Machei Inendet kogochi sobondab koigeny tugul che taachei Inendet (Johana 17:2).

Kisa Jesu kora agobo alamalyennyi. Kiga komwachi Inendet Petero eng' tai kolenji, **"Simon, Simon, keero, kagosom Setani kole konamak, si kosesak ko u nganok: ago kiasa agobo inye, si mabek kayaneng'ung' "** (Luka 22:31, 32). Kogeny, ye ki negit kome, kosa Jesu agobo alamalyennyi si korib Jehovah eng' inendet ne Ya, Setani. Saei kora agobo tugul che tun iyani Inendet eng' ibinwek che bwanei, amu baornatetab chuto bo alamalyet iyanotin. Kisaei Jesu eng' yuto agobo inye!

Saei Kiptaiyat Jesu kotugul agobo inye. **"Eng' noto anyun komuchi kogeny kosor agoi kasuldaet ichek che bwanjin Jehovah eng' inendet, amu sobei inendet koigeny si kobiit kosaei agobo ichek"** (Hebranik 7:25). Bo kwong'et ne tia anyun Yetindet ne ketinye! Ne siirei ko ole saitoi agobo achek si keegu agenge ak Inendet, ak keegu agenge achege eng' chamnyet! Ngewal sautikyik eng' sobondang'ung' ak eng' gong'ung' rani.

Betut ye kisaei Jesu eng' Getsemane, koteebe alamalyennyi kolenji, **"Nee, kaga momuchi oripse kobota agot sait agenge?"** (Matayo 26:40). Tos itabani boroindo betut age tugul si ong'alal ak Kiptaiyat Jesu, ye isae agobo ichek che betyotin ak agobo bortanyi, noto Kaniset? Kitinye anyun boroindo ne tia keriky Inendet eng' "ng'echeret ne bo mieindo" betut age tugul! **"Ongeriky anyun ng'echeret ne bo mieindo eng' nyiganatet, si kenyoru rirenetab ge, ak kesich mieindo ne toretch eng' betut ne kinyalili"** (Hebranik 4:16).


ATINDIOT 27. KITINYEI JESU KIMNATET ENG' SOBONDANYI AK MEENNYI

Johana 10:17, 18

¹⁷Chama anyun Kwanda amu noto, amu agoitoi sobondanyu, si kobiit anam kogeny. ¹⁸Marebena chi, ago goitoi anege. Atinye kimnatet agoito, ak atinye kimnatet anam kogeny. Kiataach ng'atutioni eng' Baba.

Johana 19:4-11

⁴Ak kimanda Pilato kogeny, ak kolenji ichek, Ogeero, kamutwak inendet konyo taing'wong', si onai ole ma anyorji ane lelut inendet. ⁵Komong' Jesu anyun konyo sang', ko kerat metit eng' ngatietab katok, kolaagonu ngorionoto arus ne birir. Ak kolenji Pilato bichoto, Ogeer chichi anyun-o! ⁶Ye kingooger anyun inendet tisiik che eechen ak kiptainik, kobolyo, kole, Igartat, igartat. Kolenji Pilato, Omot okwek inendet ak ogartat: amu ma anyorji lelut. ⁷Kowolji Yahudik kolenji, Kitinye ng'atutiet, ak kanyol kome amu ng'atu-



tionoto, amu kiyagei koek Weritab Jehovah. ⁸Ye kingogas anyun Pilato mwaonato, koiywei mising'; ⁹ak kiwa Praitorium orit kogeny, ak kolenji Jesu, Ibunu ano? Ago ma wolji Jesu inendet. ¹⁰Kolenji Pilato anyun inendet, Metwekwa? mengen ile atinye kimnatet atiachin, ak atinye kimnatet agartatin? ¹¹Kowolji Jesu kolenji, Kama ko tetinye kimnatet iyaiywa kiy, nda kama kigonin eng' barak; noto anyun, tinyei inendet ne koindea euneguk tengekto ne o kosiir.

Tos Kiimugaksei Kome Jesu?

Amu Jesu ko Weritab Jehovah iman, ko tos kiimuchi bik kobar Inendet? Mami chi ne tinyei kimnatet eng' Inendet. Kilewen kityo Inegei kome ak kosob kogeny.

Kilenji Jesu Pilato, **“Ma bo ng’onyuni laitornatennyu: nda bo ng’onyuni laitornatennyu, ko kata yaei boriet kiboitinikyuk, si ma kindea eunekab Yahudik”** (Johana 18:36). Kiigoitogei Jesu konam Yahudik. Kingenam komwa Inendet kole **“Ilen mamuchi asom Baba, ak koyokwa agot nguno malaikaisiek che siirei lugosiek taman ak aeng’? Isuldoitoi ano anyun sirutik, che len egu ko u nito matiny?”** (Matayo 26:53, 54). Kiimuchi malaikai-siek che kiboisiechin Jesu ye kisaei eng’ mbaret, kobar askarik che kinamei Jesu. Ago kiingen Jesu magetab Jehovah ne kiga-geng’any eng’ Sirutik che Tililen.

Kigaisib komwa Jesu Inendet kole, **“Kanyolji Weritab chi konyalil eng’ tuguk che chang’, ak koesio boisiek inendet ak ti-siik che eechen ak sirik, ak kebar, ak king’eet eng’ betutab somok”** (Luka 9:22). Keero, kime Jesu amu ki chobetab Jehovah koboch ko tom keyai ng’ony (Ng’ang’utiet 13:8).

Ki chobet ne kikwong’e ne bo Jehovah koterter Jesu meet! **“Amu yamdoi anyun lagok korotik ak borto, kinam choto inendet agine ko u noto; si kobiit kong’em eng’ oretab meet inendet ne tinyei kimnatetab meet, noto ko oindet; si kobiit kotiach ichek tugul che ki ratotin betusiekwak tugul eng’ kaiwei-sietab meet”** (Hebranik 2:14, 15). Tos iywei meet? Kime Jesu si kotiachin eng’ kaiweisiet! Ee, kilewen Jesu kogoito sobondanyi agobo inye!

ATINDIOT 28. KIGARTATI JESU AK KETUBEI

Johana 19:17, 18, 30-37

¹⁷Ak komanda, koibeinegei kimurtoiyot, agoi koit ole kiguure Koretab terta, ne kiguure eng’ kutitab Hebranik, Gologota: ¹⁸ole kiigartate ichek inendet, koboto aeng’ alak, age komosi ak age komosi, ak kimi Jesu kwen.

³⁰Ye kingo kagotaach Jesu siki, komwa kole, Kagogesgei:

ak koabuch metinnyi, ak kogoito tamirmiriennyi kwo.

³¹Amu ki Chobet ak kima kemakyin muswek kotebe kimurtoiyot eng’ sabato (amu ki o betunoto bo sabato), kosom Yahudik Pilato kole keiri kelyekwak, si kesutei. ³²Kobwa anyun askarik, ak koiri kelyekab ne bo tai, ak ne bo age ne kiga kigartat koboto inendet.

³³Ago ye kingobwa ye mi Jesu, ak kogeer kole kagome, ko mata koiri kelyekyik: ³⁴ago kitoo-re ng'otit karastanyi age eng' askarik, ak ngunoto komong' korotik ak beek. ³⁵Ak kibaurian inendet ne kigeer, ak ko bo iman baornatennyi: ak ingen inendet kole mwaei iman, si kobiit oyan ak okwek. ³⁶Kiyaak tuguchu, si kobiit kosulda sirutiet ne kile, Magiiriei kowennyi. ³⁷Ak kogeny mwaei sirutiet age kole, Tun keerei ichek inendet ne kitoorei.

Johana 19:40-42

⁴⁰Kisut anyun mustab Jesu, ak kotaa eng' ngoroik che bo



katanit koboto nyamdutik, ko u biteetab Yahudik ye tubisiei. ⁴¹Kimi mbaret ole kigigartate inendet; ak kimi mbaranato kererit ne leel ne kitom ketupchi chi. ⁴²Kiinde anyun Jesu oloto amu betutab Chobetab Yahudik, amu ki negit kererit.

Kichobetab Jehovah Meetab Kristo

Kiguitosi Bukuit ne Tilil ye kinai kele tinyei Sirutik tugul kaborunet agobo Jesu Kristo. “Ak kitoi koboch Musa ak maotik tugul, ak kiiarorji ichek eng' sirutik tugul ng'alek agobo inendet” (Luka 24:27). Kiingen Jesu kole, “. . . kanyol kosulda tuguk tugul, che kigisir eng' Ng'atutik che bo Musa, ak eng' maotik, ak eng' tienwogikab kalosunet, agobo ane” (Luka 24:44). “Koyat anyun ng'omnatosiekwak, si kobiit konai sirutik; ak kilenji ichek, Kigisir ko u noto, kele, nyoljin Kristo konyalil, ak kong'eet kogeny eng' che kigobek eng' betutab somok, ak keamdaat eng' bororiosiek tugul sigunet ak nyoetab kaat ne bo tengekwojik eng' kainennyi, kitaune Jerusalem” (Luka 24:45-47).

Kwong'et ne tia anyun chobetab Jehovah! Ngot itinye Bukuit ne Tilil, isoman Sirutik che Tililen che sirotin eng' tai si i-geer ole kimwachindo Jehovah ng'ony agobo chobennyi eng'

Arorutiet ne bo Keny ak ole kiisuldaita Jesu chobonato. (Chuto ko kebeberta kityo eng' maonatosiek 300 che kigimwa agobo nyonunet ne bo tai ne bo Jesu.)

Kiluul Setani yautikab Jehovah (choto bik), ago kichob Jehovah oretab sorunet, ak kiisulda chobonato bo sorunet! lchek che machei kesor komugaksei kitiach eng' ratutietab Setani *nguno!*


CHOBETAB JEHOVAH agobo JESU	MAONATET	KASULDAET
Bunu "iyotetab kwondo"	Taunet 3:15	Galatiek 4:4
Bunu "iyotetab Abraham"	Taunet 18:18	Boisionik 3:25
Kisikyin Betlehem	Mika 5:2	Matayo 2:1
Sichei bergeiyat	Isaia 7:14	Matayo 1:18
Sib koboisie eng' Galili	Isaia 9:1, 2	Matayo 4:12-16
Maotiot ne nyonei	Ne Ki. Ng'a. 18:15	Johana 6:14
Tisiindet Koigeny	Tien. Kal. 110:4	Hebranik 6:20
Laitoriat ne bo koigeny	Isaia 9:7	Johana 18:36, 37
Esioi Inendet Yahudik	Isaia 53:3	Johana 1:11; 5:43
Wendi Jerusalem Kilosunoti	Sekaria 9:9	Johana 12:13-15
Ng'wektoi choruennyi	Tien. Kal. 41:9	Mariko 14:10
Kialdae fedaisiek sosom	Sekaria 11:12	Matayo 26:15
Itaami baorinikab lembech	Tien. Kal. 27:12	Matayo 26:60, 61
Sisei ye kitaami	Isaia 53:7	Matayo 26:62, 63
Kibirei ak kesing'ilji	Isaia 50:6	Mariko 14:65
Kigartati koboto kiptengeginik	Isaia 53:12	Matayo 27:38
Kitoorei eunek ak kelyekyik	Tien. Kal. 22:16	Johana 20:27
Kichurei ak kechot	Tien. Kal. 22:6-8	Matayo 27:39, 40
Kigochin siki koe	Tien. Kal. 69:21	Johana 19:29
Sachin bunikyik	Isaia 53:12	Luka 23:34
Kitoorei karastanyi	Sekaria 12:10	Johana 19:34
Magiiriei kowennyi	Tien. Kal. 34:20	Johana 19:33
Kitubei koboto magorek	Isaia 53:9	Matayo 27:57-60
Agobo Ng'eetyennyi	Tien. Kal. 16:10	Matayo 28:9
Togostoi Barak Kipsengwet	Tien. Kal. 68:18	Luka 24:50, 51

(Kisomani atindiot komugul agobo meetab Jesu eng' Matayo 26 ak 27; Mariko 14 ak 15; Luka 22 ak 23; Johana 18 ak 19; Isaia 53; ak Tienwogikab Kalosunet 22.)

ATINDIOT 29. KONG'EETEI JESU ENG' CHE KIBEK

Johana 20:1-9

¹Kinyo kererit Maria Magdalene, karon, ko kairir emet, eng' betut ne bo tai ne bo wigit, ak kogeer koita ko kageisto eng' kererit. ²Kolabat kot koit ole mi Simon Petero, ak noto age ne bo alamalyet, ne kichamei Jesu inendet, ak kolenji ichek, Kageib Kiptaiyat eng' kererit, ama kingen ole kaginde. ³Koba anyun Petero, ak nin age ne bo alamalyet, kotokyigei kererit. ⁴Kiruai tuwai kibagenge: ak kilabat nin age ne bo alamalyet kondoe Petero, ak kosib koit kererit; ⁵ak kingong'uruk kogeer orit, kogeer ngoroikab katanit ko itootin; ago mawa orit. ⁶Konyo anyun Simon Petero agine, kosubu inendet, ak kwo kererit



orit; ak kogeer ngoroik che bo katanit ko itootin; ⁷ago anget ne kimitei metinnyi ko kima komi, koboto ngoroik che bo katanit, ago ki mamangat inengei eng' oldo age. ⁸Kiwa orit agine noto age ne bo alamalyet ne kiga sib koit kererit, ak kigeer ak kiiyan. ⁹Amu kitom konai sirutiet ne kile, ng'eetei kogeny matiny eng' che kibek.

Kamanutietab Ng'eetyet

Kiteeb Job keny kole, **“Ngo mee chito, kosobei?”** (Job 14:14). Ni ko wolunennyi ne bo kagasetab ge: **“Angen ale sobei Katia-gindennyu, Ak tun tonone ng'ony eng' betut ne bo let: Ak ye kagong'emak iririondennyu ko u ni, Ageere Kamuktaindet ko ma ami eng' bortanyu”** (Job 19:25, 26). Ee, ko u ye sobei Jesu, kesoptosi agachek (Johana 14:19).

“Amu kigigartat eng' nyalulet, ago sobei eng' kamuktaetab Jehovah. Amu ki nyalulyotin ak achek eng' inendet, ago kisoptosi koboto inendet eng' kamuktaetab Jehovah agobo okwek” (2 Korintoek 13:4).

Kisir Paulo Logoiywek che Miach eng' nwagindo eng' koito-siek aeng'. **"Amu kiagonok eng' tai noto kiataach agane, ale kime Kristo agobo tengekwogikyok, ko u ye mwaei sirutik, ak kigitub; ak kiging'eet eng' betutab somok ko u ye mwaei sirutik"** (1 Korintoek 15:3, 4).

Nda ma ng'eetyetab Jesu Kristo, ta ma mi logoiywek che miach che keamdoi. Ta magitinye kamang'unet. Ta kitebye eng' tengekwogikyok ak ko ki che kigetilji kiruogetab meet. Ago kongoi eng' Jehovah amu sobei Jesu ak komuchi kome-nyin! **"Ago ngo menyok Tamirmirietab inendet ne kiing'eet Jesu komong'une che kibek, kosoobi borwekwok che begu inendet ne kiing'eet Kristo Jesu komong'une che kibek, eng' Tamirmiriennyi ne menyei eng' okwek"** (Romanik 8:11).

Nguno anyun ko Nyolu Kesopche Agobo Inendet

"Amu ichiichech chamnyetab Kristo; amu kigeere ko u ni, kele kimechi chito agenge tugul, noto anyun kibek tugul; ak kimechi inendet tugul, si ma kosoptos, agobo ge icheget che soptos, ago agobo inendet ne kimechi ak kong'eet kogeny" (2 Korintoek 5:14, 15). Kigi begunotin eng' tengekwogikyok ye kingo mee Kristo agobo achek; kisoptos nguno eng' Jehovah. Ki bik che leelach eng' Inendet. Ma nyolu kesopche agobo ge ago agobo Inendet! **"Amu kigialenak kamanutiet: otoror Jehovah anyun eng' borwekwok"** (1 Korintoek 6:20).

ATINDIOT 30. KOBORJINGEI JESU MARIA

Johana 20:11-17

"Ago kitononi Maria eng' kererit sang', korirei: ak ye kita korirei, kong'uruk koiit kererit; ¹²ak kigeer malaikaisiek aeng' che leelach ngoroik kotebyei ng'ony, age eng' ole bo metit, ak age eng' ole bo kelyek, eng' ole kimi bortab Jesu. ¹³Ak kilenji, Kobogoriondo-

ni, kalya si irir? Kolenji, Amu kageib Kiptaiyandennyu, amangen ole kaginde inendet. ¹⁴Ak ye kingo kagomwa ko u noto, koweelgei, kogeer Jesu kotononi, ama konai kole Jesu noto. ¹⁵Kolenji Jesu, Kobogoriondoni, kalya si irir? icheng'e ng'o? Kiibwati kolen inendet ko ribindetab mbaret, ak ko-



lenji, Kiptaiyandani, ngo kaiib inendet eng' oli, imwawa ole kainde, si aib inendet. ¹⁶Kolenji Jesu, Maria. Koweelgei, ak kolenji eng' kutitab Hebranik, Rabboni; ye kiweech kele, Konetindoni. ¹⁷Kolenji Jesu, Ametwaa; amu tom atogosyi oldab Kwanda: ago ui ole mi tupchosiekyuk, ak ilenji, Atogosyini oldab Baba, ago Baba neng'wong', Jehovah nenyu, ago Jehovah neng'wong'.

Ole konyititoi Jesu Kobogorisiek

Kiiborji-Jesu kondit kobogorisiek eng' saisiekab arogenet ak boiboiyet. Agot ye kinyalili Jesu eng' kimurtoiyot kong'alalji kamennyi eng' talasiet ak komwachi alamalyennyi ne kichamei noto Johana korib inendet (Johana 19:26, 27). Kora, eng' katerteretab ng'eetyennyi, kolewen isib koborjigei ne bo tai kobogoriot—Maria age.

Kobogorisiek che konyiti Jehovah ak komang'u Inendet, che tinyei eng' mugulelwekwak lelesta ne bo ung'ot ne tala ak kosi-sei eng' tamirmiriet ko u **“eng' taitab Jehovah ko bo kamanutiet ne o”** (1 Petero 3:4). Kingoyai Jehovah chito eng' itondanyi, koyai muren ak tie koek kit ne igesunotgei si kobarta kergeindanyi (Taunet 1:27). Eng' tuguk che bo tamirmiriet, kogo-chin Jehovah kobogorisiekak murenik boroindo agenge ne bo yetunet eng' taaksetab borotet. **“Kigogonech eng' choto arurutik che miachen mising' ak ko eechen inne; si kobiit oegu eng' chuto yamdoikab atebetab Jehovah ...”** (2 Petero 1:4). **“... Ama mi ne muren anan ne tie: amu okwek tugul ko o agenge eng' Kristo Jesu”** (Galatiek 3:28b).

Konyiti inne Jehovah kobogorisiek ak king'at manong'otaik kocham osotikwak ko u Kristo ne kicham Kaniset ak kogoito sobondanyi (Epesoek 5:25). **“Ko u noto kanyolji manong'otaik**

agichek kocham osotikwak ko u ye chamei borwekwak ichegei. Inendet ne chamei osotindennyi kochamegei inegei” (Epesoek 5:28). Chamei Jehovah yamdaet ne igesunotgei ak kosyinet eng’ manong’otiot ak osotiot. Wechei Inendet besiet. “Amu aweche besiet, mwaei Jehovah, Kamuktaindetab Israel” (Malaki 2:16). “Osulde anyun boiboiyennyu, si oegu che bo kwatet agenge, otinye chamnyet agenge, o bo yamdaet agenge, che bo maget agenge. Amoyai kiy age tugul eng’ toiyet, anan eng’ kalosunetab ge, ago eng’ kaming’inetab ge ne bo naet, koiiti chi age tugul chito age kole kaigai kosiir inendet” (Pilipik 2:2, 3).


ATINDIOT 31. KOBORJINGEI JESU ALAMALYENNYI

Johana 20:19-22

¹⁹Ak ye kingoek lagat eng’ betunoto bo tai ne bo wigit, ye kiga keger kurgotik eng’ ole kimi alamalyet, amu kiiywei Yahudik, konyo Jesu kotonone kwenunywa ak kolenji, Ingoteb kalyet eng’ okwek.

²⁰Ak ye kingo kagomwa nito, koborji eunekyik ak karastanyi. Koboiboitu anyun alamalyet, ye kingooger Kiptaiyat.

²¹Kolenji Jesu anyun kogeny, Ingoteb kalyet eng’ okwek: ko u ye kiiyokwa Kwanda, ayoktook ak okwek ko u noto.




²²Ak ye kingo kagomwa nito, kobusyi, ak kolenji, Otaach Tamirmiriet ne Tilil.

Kit ne Kiyaei

Kimwa nee Jesu? Inyiit ole ma sirotin.

1. “Ingoteb _____ eng’ okwek” (koitet 19).
2. “Ko u ye kiiyokwa Kwanda, _____ ko u noto” (21).
3. “_____ Tamirmiriet ne Tilil” (22).

ATINDIOT 32. KOYANI NE BO ALAMALYET NE KITINYEI SAGET



Johana 20:24-29

²⁴Ago kima komi Tomas ne kigiguure Didumo, ne ki age eng' taman ak aeng', koboto ichek ye kinyonei Jesu. ²⁵Kolenji anyun chun alage che bo alamalyet, Kagegeer Kiptaiyat. Ago kilenji Tomas ichek, Ngot ko mageer eng' eunekyik berutik che bo kipchumarisiek,

ak ande mornennyu berutikab kipchumarisiek, ak ande eunnnyu karastanyi, ko mayani.

²⁶Ak kingobata betusiek siitu ko kimi go alamalyennyi kogeny, ak kimi Tomas koboto ichek. Kinyo anyun Jesu, ko kerotin kurgotik, ak kotonon eng' kwenunywa, ak komwa kole, Ingoteb kalyet eng' okwek. ²⁷Kolenji Tomas, Iyogou morneng'ung', ak igeer eunekyuk; ak iyogou eung'ung' ak inde karastanyu; si meegu ne matinyei kayanet, ago iyan. ²⁸Kowolji Tomas kolenji, Kiptaiyandennyu ak ko Jehovah nenyu. ²⁹Kolenji Jesu inendet, Kaiyan amu kaigeera: iberurotin ichek che iyani ama keer.

Kaberuret ne o

Mwaei Jesu kole itinye kaberuret ne o ye iyan Inendet agot ye tomo igeer kimni. Kingen Jesu nguno eng' Tamirmiriennyi ne menyech. Kingen Inendet kora eng' ng'alek che mwawech eng' Bukuit ne Tilil.

Nyonei betut ne kegeere Inendet. **“Ogeero, nyonei koboto bolik; ak tun keerei inendet konda age tugul, koboto ichek che kiga toor inendet; ak koteeiyo bororiosiek tugul che bo ng'ony amu inendet”** (Ng'ang'utiet 1:7). Tos igasigei ye week Kiptaiyat Jesu kogeny anan iarogeni? Ngot ko Jesu ko Kiptaiyandeng'ung' ak ko Jehovah neng'ung', ko u eng' Tomas, igasigei anyun mising'!

ATINDIOT 33. TINYEI JESU KAMUGET KORIBIN ENG' TUGUK CHE IMAKYINIGEI

Johana 21:2-6, 9-12, 15-17

²Kimi tugul, Simon Petero ak Tomas ne kiguure Didumo, ak Natanael ne bo Kana ne bo Galili, ak werikab Sebedi, ak aeng' alak che bo alamalye-nnyi. ³Kolenji Simon Petero, Kawe aram njirenik. Kolenji chun alage, Kibendi agachek koboten. Koba anyun ak kolany moingetab beek: ak ma nam kiy kemounoto. ⁴Ago ye kimachei koeech, kotonon Jesu eng' ngegut: ago ma nai alamalyet kole Jesu. ⁵Kolenji Jesu anyun, Lagochu, otinye kiy ne oame? Kowolji kolenji, Achicha. ⁶Ak kilenji ichek, Owirji regereiywot ne kiname njirenik komostab tai ne bo moinget, si onyuru. Kowirji anyun, ak mata komuch kochuut amu chang'indab njirenik.

⁹Noto anyun, ye kingoit ngegut, kogeer eng' yoto mat ne bo neseke, ak kiwatanat njiriot

eng' yoto, ak makatiat. ¹⁰Kolenji Jesu, Oibu njirenik alak chu korame nguno. ¹¹Kolany Simon Petero moinget, ak kochuut regereiywot konyo ngegut, ak ki nyiitat njirenik che eechen, bogol agenge ak konom ak somok: ak nganda ki chang' njirenik mising', ko ki ma kerer regereiywondonoto. ¹²Kolenji Jesu ichek, Obwa oamisie. Ak ma kany age tugul eng' alamalyet koteebe kole, I ng'o? amu kiingen kole, inendet ko Kiptaiyat.

¹⁵Ye kingo kagoamis anyun, kolenji Jesu Simon Petero, Simon, weritab Johana, tos ichama kosiir chu? Kolenji inendet, Ee, Kiptaiyandani, ingen ile achamin. Kolenji, Bai arekyuk. ¹⁶Kolenji kogeny ne bo aeng' Simon, weritab Johana, ichama? Kolenji, Ee, Kiptaiyandani, ingen ile achamin. Kolenji, Iyage kechirekyuk. ¹⁷Kolenji ne bo somok, Simon, weritab Johana, ichama? Koa-rogen Petero amu kamwachi ne bo somok, kolenji, Ichama? Ak kolenji, Kiptaiyandani, ingen tuguk tugul; ingen ile achamin. Kolenji Jesu inendet, Bai kechirekyuk.



Obwa Oamisie

Kararan ne tia kegeere Jesu kotaachei che bo alamalyet eng' amitwogikab karon! Tos amin rubet ak meelda agobo imanda? Kimwa Jesu kole, **"Boiboen che amei rubo ak meelda agobo imanda: amu tun biyong'dos"** (Matayo 5:6). Nyo tainnyi karonet age tugul si inyoru amditab tamirmiriet kobun Ng'olyo-ndennyi, noto baei sobondo kobiyo. Mwaun Kiptaiyat, Jehovah neng'ung' ne kiimong'un eng' otwoknatet, kolenjinin, **"Iseng'eng'e, si anyiit kuting'ung' "** (Tienwogikab Kalosunet 81:10b).

Ngot i bo Kristo, itinye taaget age ne kararan kot ne lenjinin "nyo amisie." Tun nyoru yamdaet kayanik tugul eng' igortab katunisietab Kristo ye nyo ko LAITORIAT NE BO LAITORINIK AK KO KIPTAIYAT NE BO KIPTAINIK. Kisir Johana kole, **"Ongeboiboitu ak kigasge mising', ak kigochi torornatet inendet: amu kagoit katunisietab Aruet, ak kago choppei osotio-ndennyi. Ak kigigochi inendet kolaach gei eng' katanit ne kararan, ne leel kot ak ko tilil; amu katanit ne kararan ko boisionikab imanda che bo bik che tililen"** (Ng'ang'utiet 19:7, 8). Tos i chobot agobo kuursonato bo igorta? Nai ile, magilaachi imandanyo betunoto. Eng' taitab Jehovah, ko u imandanyo ngoriet ne muruon (Isaia 64:6). Kiptaiyat Jesu inegei ngorietab imanda ne yaeche keegu che taagotin eng' igorato o bo katunisiet. **"Inendet ne kima kongen tengek, ko kiyai inendet koek tengek amu achek; si kobiit keegu imanda ne bo Jehovah eng' inendet"** (2 Korintoek 5:21). Kwong'et ne tia waloni: kiib Inendet tengektanyo ak kogonech imandanyi!

Bai Kechirekyuk

Ye kagobain Jesu, komagun ibai bik alak. Tos kogobaak sobondang'ung' eng' kanetetab ge ne bo Bukuit ne Tilil kobun Johana? Nyolu anyun iyamde ak bik alak tuguk che kogonetin Jehovah. **"Oyage akwetab Jehovah ne mitei kwenung'wong', . . . oegu kaborunoik eng' akwet"** (1 Petero 5:2, 3). Nyoru bik alak kaberuret ye kiyamde Ng'olyotab Jehovah koboto ichek ak keegu kaborunet ne mie eng' ichek. **"Onet ichek kosub tuguk tugul che कांग'atak: ak ogeero, ami kobotok eng' betusiek tugul, agoi kagesunetab ng'on'y"** (Matayo 28:20).

Wolunaik che bo Teebutik

Chu ko wolunaik che bo teebutik che kinyorjin Kanetetab ge ne bo Bukuit ne Tilil eng' Johana si imuch igeerjine ak che kaiwolu. Mat igeer pechini agoi iwolu teebutik tugul.

Pechit 4

- | | |
|-----------------------|----------------------------|
| 1. Jehovah | 8. korotik, borto, |
| 2. Kimi ak
Jehovah | chi, Jehovah |
| 3. sobondo | 9. borto |
| 4. mesundeito | 10. kwenunnyo |
| 5. Johana | 11. nyilennyi,
mieindo, |
| 6. bikiyik | mieindo |
| 7. lagokab
Jehovah | 12. Werit |

Pechisieik 8, 9

1. kutitab, surkwen
2. Olitit oretab
3. isubwa, ne tai
4. Aruet, Jehovah, tengektab ng'ony
5. cheptuget, Tamirmiriet ne Tilil

Pechit 14

1. Kiy age tugul ne kamwawok, oyai.
2. Kiinyiit anyun mising'.

Pechisieik 21, 22

- | | |
|---------------------------|-------------------------------|
| 1. bounindet,
kemoi | 8. kicham,
malus, |
| 2. konetindet | sobondab |
| 3. kesich, siget,
leel | 9. koruokyi, kesor |
| 4. beek,
Tamirmiriet | 10. Magiruokyi,
iyani |
| 5. borto | 11. mesundeito,
lapkeiyet, |
| 6. tamirmiriet | yaach, kiruoget |
| 7. Musa, erenet | 12. imanda |

Pechisieik 28, 29

1. ng'etatetab bandanyi
2. Inaga aee
3. Amu manamegei Yahudik ak Samarik.
4. beekab sobon
5. Ne eei beek che bo keringet "ko ta koamei melel kogeny," ago ne eei beek che igochin Jesu "ko ma koamei melel agoi."

6. Kiga kotebi ak manong'otai mut, ak inendet ne kimi tuwai ko kima ko manong'otiondennyi.
7. kosae
8. saei eng' tamirmiriet ak imanit
9. Kiwa nganaset komwachi bik agobo Kristo.
10. Koyai magetab Inendet ne kiiyok ak koges boisiennyi.
11. Nito ko Yetindetab ng'ony.

Pechit 34

- | | |
|---|-----------------|
| 1. 38 | 4. amatata iyai |
| 2. kisoobin | tengek |
| 3. Ng'eet, iwe | |
| 5. (a) Kima bistoe sabato
(b) kogergeit ak Jehovah | |

Pechit 42

- | | |
|----------------------------|----------------------|
| 1. otebye,
alamalyennyu | 4. Werit |
| 2. imanda | 5. kaochama |
| 3. otwogindetab | 6. Jehovah |
| | 7. magetab,
konai |

Pechisieik 44, 45

- | | |
|-----------------|----------------------|
| 1. Jesu | 4. sigikiyik |
| 2. bikab kokwet | 5. chichoto ki korat |
| 3. Parisaik | 6. Jesu |
| | 7. chichoto ki korat |

Pechit 61

1. kaun kelyekwok, ounjige kelyek
2. kiachamak, ochamnye

Pechit 67

- | | |
|----------------|--------------|
| 1. ng'ony | 4. buch |
| 2. Baba | 5. barei, |
| 3. kagogeerech | Jehovah |
| kagowechech | 6. nai |
| | 7. kaaterter |

Pechit 77

1. kalyet
2. ayoktook ak okwek
3. Otaach

FREE COPIES AVAILABLE

As the Lord provides the cost through contributions, free copies of this booklet will be sent to anyone who requests them for personal study or group study. Write to:

WORLD MISSIONARY PRESS, INC.
P.O. Box 120
New Paris, Indiana 46553 U.S.A.

This booklet is *not for mass distribution*.
It is for individual study and group study.



Free–Magialdoi bukuini

www.wmpress.org

Read booklets online or by App
www.wmp-readonline.org

8-22

1304/2 Kalenjin BSJ